

四庫全書

史部

欽定四庫全書

史部

春秋左傳事類始末目錄

詳校官編修臣翟槐

編修臣裴謙覆勘

總校官知縣臣繆琪

校對官編修臣秦泉

謄錄監生臣沈恕

欽定四庫全書

史部三

春秋左傳事類始末目錄
紀事本末類

隱公

元年

鄭伯克段

三年

周鄭交惡

宋穆立殤

州吁弑桓

五年

如棠觀魚

鄭敗燕師

始用六佾

六年

陳及鄭平

八年

祊易許田

鄭公子忽逆婦媯

羽父請族

九年

鄭伯以王命討宋

鄭人大敗戎師

十一年

滕侯薛侯爭長

鄭莊入許

息侯伐鄭

羽父弑隱

桓公

二年

曲沃滅晉

六年

楚子伐隨

昭厲之亂

子同生

九年

曹太子來朝

十年

虞叔伐虞公

十一年

屈瑕敗師

十六年

急壽相死

十七年

及齊師戰于奚

十八年

桓公薨于齊

王殺周公黑肩

莊公

四年

楚武王伐隨卒

六年

楚滅鄧

八年

齊師圍郕

桓公殺子糾

十年

楚子入蔡

十一年

宋立桓公

齊桓征伐盟會

十八年

虢公晉侯朝王

鬻拳自殺

十九年

五大夫立子頹

二十二年

陳敬仲辭工正

二十三年

公如齊觀社

晉去桓莊之族

丹桓宮之楹

二十六年

晉滅虞虢

二十八年

驪姬之難

申公闕班殺子元

三十二年

共仲弑子般立閔公

閔公

元年

邢遷夷儀

晉侯作二軍

二年

齊封衛楚丘

僖公

四年

鄭殺申侯

五年

鄭殺大子華

周子帶之亂

六年

楚子圍許

八年

晉敗狄于采桑

魚氏世為左師

九年

晉惠懷之敗

十六年

宋襄爭盟

十八年

鄭鑄三鍾

衛文滅邢

梁亡

二十年

王救滑以狄師伐鄭狄伐周王適鄭
隨以漢東諸侯叛楚

二十一年

大旱饑而不害

魯封須句

二十二年

秦晉遷陸渾之戎于伊川

二十三年

楚子玉敗師城濮

秦伯納晉侯

二十四年

鄭殺子臧

鄭享宋成公有加

二十六年

晉文城濮之戰

夔子不祀祝融鬻熊

二十八年

王釋衛侯

晉復曹伯

晉敗秦師于殽

晉置軍行

二十九年

介葛廬來朝

三十年

王使周公閱來聘

三十一年

狄圍衛衛遷于帝丘

三十三年

齊國莊子來聘

胥臣舉卻缺

楚殺令尹子上

文公

元年

穆伯從已氏於莒

閏三月非禮

晉及衛成

楚穆王立

穆伯如齊始聘

二年

躋僖公

襄仲立宣公

晉人改陽處父之盟

四年

楚滅江秦伯降服

衛甯武子來聘

五年

楚滅六蓼臯陶不祀

賈季殺陽處父

六年

秦伯任好卒以三良為殉

晉立靈公復士會

七年

宋襄公夫人殺昭公立文公

狄侵魯西鄙

八年

賊殺先克晉殺先都

九年

晉弑靈公

楚滅若敖氏

十年

楚范巫裔似謂三君皆將強死

十一年

鄭瞞遂亡

十三年

邾文公卜遷于繹

衛鄭因魯公請平于晉

十四年

齊懿公弑立

邾立定公

十五年

宋華耦來盟辭宴

魯文公薨齊懿公弑

十六年

楚滅庸

十八年

襄仲立宣公

宣公納莒僕季文子出諸竟

宣公

二年

晉於是有公族

三年

楚問周鼎

鄭穆公妾夢天與之蘭

四年

魯宣公伐莒非禮

鄭子公子家弑靈公

六年

晉滅赤狄

晉楚戰于邲

鄭殺公子曼滿

八年

晉滅三卻

九年

楚殺陳夏徵舒

十一年

楚薙艾獵城沂

十二年

楚子伐蕭

晉宋衛同盟于清丘

十四年

楚莊伐宋

魯逐東門氏

十五年

魏顆從武子治命

十六年

晉侯使士會平王室

十七年

齊晉鞏之役

十八年

楚盟諸侯于蜀

成公

元年

王師敗績于茅戎

二年

宋文公始厚葬

申公巫臣通吳於上國

三年

晉楚救宋鄭

晉衛尋盟

四年

魯成公如晉

晉滅趙氏

五年

梁山崩

六年

晉遷于新田

七年

吳伐郟

宋華元合晉楚之成

晉楚鄢陵之役

晉弑厲公

衛侯復孫林父

八年

宋華元來聘伯姬

楚伐莒莒無備而潰

十一年

晉敗秦師于麻隧

十三年

曹負芻殺太子自立

十四年

衛孫甯之亂

十五年

桓族亂宋

十六年

宣伯問魯于晉

十七年

齊國佐殺慶克齊殺國佐

聲伯夢涉洹

楚滅舒庸

十八年

晉立悼公

襄公

二年

齊滅萊

晉和戎服鄭

三年

楚伐吳所獲不如所亡

魯襄公始朝晉

祁奚請老

陳服于晉

魏絳戮揚子之僕

四年

穆叔如晉

魯始騷

五年

季文子卒

七年

三卜郊不從免牲

晉韓獻子請老

九年

宋災

穆姜薨於東宮

秦景公乞師于楚以伐晉

十年

公會吳于柤

晉滅偃陽

盜殺鄭執政

王叔陳生與伯輿爭政

十一年

季武子作三軍

十二年

吳子壽夢卒

靈王求后於齊

十三年

晉侯蒐于綿上

楚共王卒

子囊卒

吳侵楚楚敗吳師

十四年

子叔齊子為季武子介自是晉敬魯使

吳公子光之亂

晉伐秦遷延之役

晉盡殺欒氏之族黨

吳敗楚歸師

溴梁之會

十五年

宋向戌尤孟獻子之室

楚能官人

宋子罕弗受獻玉

十六年

宋子罕止築臺者之謳

齊晏桓子大夫而行士喪禮

十九年

齊崔慶之亂

衛石共子卒

二十年

陳殺二慶

季武子如宋聘

二十一年

魯季孫來外盜

楚殺子南

羊石氏之族及於難

二十二年

穆叔能用教

晉召鄭朝

鄭子張善戒

鄭游反奪逆妻者

二十三年

杞孝公卒晉平公不徹樂

臧紇作不順去魯

二十四年

穆叔對死而不朽

范宣子重幣鄭伯朝晉且請伐陳

楚滅舒鳩

豎牛亂叔孫氏

子產始知然明

二十五年

宋向戌弭諸侯之兵

楚蔣掩得治國之禮

二十六年

晉叔向召行人子貢

鄭請印董父

宋左師伊戾殺太子

楚聲子復椒舉

韓宣子辭不失舊

晉趙文取喪邑復諸侯

二十八年

無冰宋鄭其饑

子產知蔡景侯不免

鄭伯有侈愎而死

二十九年

公治致其邑於季氏

鄭罕宋樂施而不德

晉平公城杞

吳公子札請觀周樂

齊放其大夫高止

三十年

楚令尹圍行大事

宋災

楚滅陳蔡

楚靈王之死平王之立

鄭子皮授子產政

子產為政

三十一年

穆叔劉定公秦后子知趙孟之死

晏子知姜弱嬀氏始昌

晏子知昭公不能終

子服惠伯知滕成公將死

子產如晉壞墻垣

北宮文子謂鄭有禮

鄭子產不毀鄉校

昭公

元年

季武子伐莒瀆齊盟楚人欲戮叔孫

鄭討公孫黑之罪

秦后子有寵於桓如二君懼選適晉

晉中行敗狄于大鹵

晉侯有疾鄭公孫僑問疾

二年

韓宣子聘魯見易象與魯春秋如齊逆女

叔弓聘于晉辭郊勞

三年

鄭伯如晉晉賜公孫段州田

小邾穆公來朝

四年

楚使椒舉請昏于晉

正月大雨雹

鄭子產作丘賦

吳伐楚報朱方之役

五年

魯昭公如晉郊勞贈賄無失禮

六年

鄭人鑄刑書

齊侯如晉請伐燕

十年

楚子成章華之臺昭公如楚

晉侯問士文伯日食

晉侯有疾韓宣子問夢于子產

衛立靈公

八年

石言于晉

晉成虎祁之宮諸侯有貳心

係十三年

大蒐于紅

九年

周甘人與晉閻嘉爭閻田

晉荀盈卒晉侯飲酒樂

築郎圃

十年

平子伐莒始用人於亳社

宋平公卒

十一年

單成公卒

十二年

齊衛鄭如晉朝嗣君

南荊以費叛

十三年

楚殺闕成然

平王使枝如子躬聘于鄭

叔向制刑不隱於親

晉滅鼓

吳滅州來

十五年

禘于武公叔弓卒

楚費無極害朝吳在蔡

穆后崩景王求彝器於晉

十六年

楚取蠻氏

齊侯伐徐賂以鼎而還

晉韓起聘鄭求環

昭公至自晉

鄭大旱

十七年

小邾穆公來朝

剡子來朝

晉滅陸渾氏

星孛于大辰宋衛陳鄭皆火

十九年

楚工尹赤遷陰于下陰

吳用伍員之謀楚始病

齊師入紀

鄭大水

二十年

宋華向之亂

衛齊豹北宮喜褚師圃公子朝之亂

齊侯疥晏子言修德而可

齊侯田晏子論和同

子產古之遺愛

二十一年

天王將鑄無射

蔡侯奔楚

魯以十一牢禮晉士鞅

叔輒哭日食

二十二年

王子朝之亂

二十三年

邾人城翼還武城人取邾師

二十四年

日有食之

二十五年

宋逐右師

季氏逐昭公

趙簡子問禮

楚子常欲立子西

二十六年

齊侯欲禳彗星

晏子論禮可以為國

二十七年

楚子常滅卻氏

二十八年

晉滅邾氏羊舌氏

二十九年

龍見于絳郊

晉范中行之亂

三十一年

邾黑肱以濫來奔

三十二年

越滅吳

定公

二年

邾莊公卞急而好潔

四年

劉文公合諸侯于召陵長衛侯於盟

鄭子大叔卒

五年

魯陽虎之亂

八年

定公侵齊門于陽州

魯始尚羔

衛叛晉

鄭駟歆用鄧析竹刑

十年

齊人歸鄆驪龜陰之田

宋寵向魋

十二年

衛公孟彊伐曹

魯墮三都

十三年

衛逐公叔氏

十四年

衛蒯聩輒爭國

十五年

邾隱公來朝

哀公

三年

桓僖災

季孫有疾命正常以後事

五年

齊陽生弑荼

鄭駟秦富而侈

六年

楚滅陳

七年

魯伐邾吳齊伐魯

宋滅曹

九年

鄭圍宋取邑大敗晉卜救鄭

十一年

陳轅頗出奔鄭

衛太叔疾出奔宋

季孫用田賦

十二年

昭夫人孟子卒

十四年

西狩獲麟

小邾射以句繹來奔

陳常弒簡公

宋桓魋之亂

成叛

十六年

孔丘卒

楚白公之亂

十八年

楚公孫寧敗巴師

二十一年

越人始來

二十三年

宋景曹卒

晉伐齊

二十四年

哀公如越

二十六年

宋立昭公

二十七年

越子盟于平陽


晉荀瑶伐鄭

臣等謹案春秋左氏傳事類始末五卷宋章
冲撰冲字茂深葉夢得之壻淳熙中嘗知台
州是書用史家記事之例初別六家後歸二
體編年紀傳相輔而行至宋孝宗時袁樞舛
紀事本末使一事自具首尾循覽易明遂於

二體之外別為門徑左傳隨經隸事體本編
年又加以先經後經錯經諸例端緒彌為紛
繁讀者猝難融貫冲作是書一如表樞通鑑
紀事本末之體聯貫排比使一事自為起訖
雖無關經義而頗便檢尋自冲以後編錄左
氏書者或以國分或以人分或以事分凡數
十家而未已雖體例小殊其源皆自冲發也
乾隆四十六年五月恭校上

總纂官臣紀昀陸錫熊臣孫士毅

總校官臣陸費墀



欽定四庫全書

史部
春秋左傳事類始末卷一

詳校官編修臣 翟槐

編修臣 裴謙覆勘

總校官知縣臣 繆琪

校對官編修臣 秦泉

謄錄監生臣 沈恕

欽定四庫全書

春秋左傳事類始末卷一

宋 章沖 撰

隱公

十一年

元年

鄭伯克段

鄭武公娶于申曰武姜生莊公及共叔段莊公寤生驚
姜氏故名曰寤生遂惡之愛共叔段欲立之亟請於武
公公弗許及莊公即位請京使居之謂之京城大叔祭

仲曰都城過百雉國之害也

方丈曰堵三堵曰雉侯伯之城方五里徑三百雉故

都城不過百雉

先王之制大都不過參國之一中五之一小九

之一今京不度非制也君將不堪公曰姜氏欲之焉辟
害對曰姜氏何厭之有不如蚤為之所無使滋蔓蔓難
圖也蔓草猶不可除況君之寵弟乎公曰多行不義必
自斃子姑待之既而大叔命西鄙北鄙貳於已公子呂
曰國不堪貳君將若之何欲與大叔臣請事之若弗與
則請除之無生民心公曰無庸將自及大叔又收貳以

為己邑子封曰厚將得衆公曰不義不暱厚將崩大叔
完聚繕甲兵具卒乘將襲鄭夫人將啓之公聞其期曰
可矣命子封帥車二百乘以伐京京叛大叔段段入于
鄆公伐諸鄆大叔出奔共遂寘姜氏于城潁而誓之曰
不及黃泉無相見也既而悔之潁考叔為潁谷封人聞
之有獻於公公賜之食食舍肉公問之對曰小人有母
皆嘗小人之食矣未嘗君之羹請以遺之公曰爾有母
遺繫我獨無潁考叔曰敢問何謂也公語之故且告之

悔對曰君何患焉若闕地及泉隧而相見其誰曰不然
公從之公入而賦大隧之中其樂也融融姜出而賦大
隧之外其樂也洩洩遂為母子如初君子曰穎考叔純
孝也愛其母施及莊公詩曰孝子不匱永錫爾類其是
之謂乎

三年

周鄭交惡

鄭武公莊公為平王卿士王貳于虢鄭伯怨王王曰無

之故周鄭交質王崩周人將畀虢公政鄭祭足帥師取
溫之麥秋又取成周之禾周鄭交惡君子曰信不由中
質無益也明恕而行要之以禮雖無有質誰能間之苟
有明信澗溪沼沚之毛蘋蘩藎藻聚藻之菜筐筥錡釜之
器潢汙停水行潦流潦之水可薦於鬼神可羞於王公而况

君子結二國之信行之以禮又焉用質風有采蘋采蘋
雅有行葦洞酌昭忠信也 六年鄭伯如周始朝桓王

也

奪政後
始朝

王不禮焉周桓公言於王曰我周之東遷晉

鄭焉依善鄭以勸來者猶懼不旣況不禮焉鄭不來矣

八年虢公忌父始作卿士于周 十一年王取鄆劉

為邾之田于鄭而與鄭人蘇忿生之田君子是以知桓王之失鄭也恕而行之德之則也禮之經也已弗能有而以與人人之不至不亦宜乎 桓五年王奪鄭伯政

鄭伯不朝王以蔡人衛人陳人伐鄭鄭伯禦之王為中軍虢公林父將右軍蔡人衛人屬焉周公黑肩將左軍陳人屬焉鄭子元請為左拒以當蔡人衛人為右拒以當陳

人曰陳亂民莫有關心若先犯之必奔王卒顧之必亂
蔡衛不枝固將先奔既而萃於王卒可以集事從之曼
伯為右拒祭仲足為左拒原繁高渠彌以中軍奉公為
魚麗之陳先偏後伍車二十五乘曰偏伍承彌縫戰于繻葛命
二拒曰旂動而鼓蔡衛陳皆奔王卒亂鄭師合以攻之
王卒大敗祝聃射王中肩王亦能軍祝聃請從之公曰
君子不欲多上人況敢陵天子乎苟自救也社稷無隕
多矣

宋穆立殤

宋穆公疾召大司馬孔父而屬殤公焉曰先君舍與夷而立寡人寡人弗敢忘若以大夫之靈得保首領以沒先君若問與夷其將何辭以對請子奉之以主社稷寡人雖死亦無悔焉對曰羣臣願奉馮也公曰不可先君以寡人為賢使主社稷若棄德不讓是廢先君之舉也宣曰能賢光昭先君之令德可不務乎吾子其無廢先君之功使公子馮出居于鄭穆公卒殤公即位君子曰

宋宣公可謂知人矣立穆公其子饗之命以義夫商頌
曰殷受命咸宜百祿是荷其是之謂乎 桓元年宋華
父督見孔父之妻于路目逆而送之曰美而豔 二年
春督殺孔父而取其妻公怒督懼遂弑殤公初殤公立
十年十一戰民不堪命孔父嘉為司馬督為大宰故因
民之不堪命先宣言曰司馬則然已殺孔父而弑殤公
召莊公于鄭而立之以親鄭以郕大鼎賂公故遂相宋
公夏取郕大鼎于宋納于大廟臧哀伯諫曰君人者將

昭德塞違以臨照百官猶懼或失之故昭令德以示子

孫是以清廟茅屋大路越席

結草

大羹不致粢食不鑿昭

其儉也衮冕黻

韋韞也
以蔽膝

珽

它頂切
玉笏

帶裳

帶草
帶也

幅音逼舄

履衡統

多敢切冠
之垂者

紃

宏音纓從
下而上者

紕

延音冠
上覆

昭其度也藻

率

律音以韋為
之用以藉玉

鞞鞶

紳帶

厲

大帶
垂者

游

旌旗
之游

纓

在馬
前昭其

數也火龍黼黻昭其文也五色比象昭其物也錫鑾和

鈴

錫在馬額鑾在鑣
和在衡鈴在旂

昭其聲也三辰旂旗昭其明也夫

德儉而有度登降有數文物以紀之聲明以發之以臨

照百官百官於是乎戒懼而不敢易紀律今滅德立違而寘其賂器於大廟以明示百官百官象之其又何誅焉國家之敗由官邪也官之失德寵賂章也郅鼎在廟章孰甚焉武王克商遷九鼎于雒邑義士猶或非之而況將昭違亂之賂器於大廟其若之何公不聽周內史聞之曰臧孫達其有後於魯乎君達不忘諫之以德

州吁弑桓

衛莊公娶于齊東宮得臣之妹曰莊姜美而無子又娶

于陳曰厲媯生孝伯早死其娣戴媯生桓公莊姜以為
己子公子州吁嬖人之子也有寵而好兵公弗禁石碯
諫曰臣聞愛子教之以義方弗納於邪驕奢淫佚所自
邪也四者之來寵祿過也將立州吁乃定之矣若猶未
也階之為禍夫寵而不驕驕而能降降而不憾憾而能
矜之忍切重也者鮮矣且夫賤妨貴少陵長遠間親新間舊
小加大淫破義所謂六逆也君義臣行父慈子孝兄愛
弟敬所謂六順也去順效逆所以速禍也君人者將禍

是務去而速之無乃不可乎弗聽其子厚與州吁游禁之不可桓公立乃老 四年春州吁弑桓公而立初宋殤公之即位也公子馮出奔鄭鄭人欲納之及州吁立將修先君之怨于鄭而求寵於諸侯以和其民使告于宋曰君若伐鄭以除君害敝邑以賦與陳蔡從故宋公陳侯蔡人衛人伐鄭公問於衆仲曰衛州吁其成乎對曰臣聞以德和民不聞以亂以亂猶治絲而棼之也夫州吁阻兵而安忍阻兵無衆安忍無親衆叛親離難以

濟矣夫兵猶火也弗戢將自焚也州吁弑其君而虐用其民於是乎不務令德而欲以亂成必不免矣州吁未能和其民厚問定君於石子石子曰王覲為可曰何以得覲曰陳桓公方有寵於王陳衛方睦若朝陳使請必可得也厚從州吁如陳石碣使告于陳曰衛國褊小老夫耄矣無能為也此二人者實弑寡君敢即圖之陳人執之而請涖於衛衛人使右宰醜涖殺州吁于濮石碣使其宰孺羊肩涖殺石厚于陳君子曰石碣純臣也惡

州吁而厚與焉大義滅親其是之謂乎衛人逆公子晉于邢而立之

五年

如棠觀魚

公如棠觀魚臧僖伯諫曰凡物不足以講大事其材不足以備器用則君不舉焉君將納民於軌物者也故講事以度軌量謂之軌取材以章物采謂之物不軌不物謂之亂政亂政亟行所以敗也故春蒐夏苗秋獮冬狩

金定已居
卷一
皆於農隙以講事也三年而治兵入而振旅歸而飲至以數軍實昭文章明貴賤辨等列順少長習威儀也鳥獸之肉不登於俎皮革齒牙骨角毛羽不登於器則公不射古之制也若夫山林川澤之實器用之資阜隸之事官司之守非君所及也公曰吾將略地焉遂往陳魚而觀之僖伯稱疾不從僖伯卒公曰叔父有憾於寡人寡人弗敢忘葬之加一等

鄭敗燕師

鄭人侵衛牧衛人以燕師伐鄭鄭祭足原繁洩駕以三軍軍其前使曼伯與子元潛軍軍其後燕人畏鄭三軍而不虞制人鄭二公子以制人敗燕師于北制君子曰不備不虞不可以師

始用六佾

考仲子之宮將萬焉公問羽數於衆仲對曰天子用八諸侯用六大夫四士二夫舞所以節八音而行八風故自八以下公從之於是初獻六羽始用六佾也

六年

陳及鄭平

鄭伯侵陳大獲往歲鄭伯請成于陳陳侯不許五父諫曰親仁善鄰國之寶也君其許鄭陳侯曰宋衛實難鄭何能為遂不許君子曰善不可失惡不可長其陳桓公之謂乎長惡不悛從自及也雖欲救之其將能乎商書曰惡之易也如火之燎于原不可鄉邇其猶可撲滅周任有言曰為國家者見惡如農夫之務去草焉芟夷蕪

崇之絕其本根勿使能殖則善者信矣 七年陳及鄭
平陳五父如鄭涖盟軟如忘洩伯曰五父必不免不賴
盟矣鄭良佐如陳涖盟亦知陳之將亂也 桓五年春
陳侯鮑卒文公子佗殺大子免而代之 六年蔡人殺
陳佗

八年

枋易許田

鄭伯請釋泰山之祀而祀周公以泰山之枋易許田三

月鄭伯來歸祊不祀泰山也 桓元年公即位修好于鄭鄭人請復祀周公卒易祊田公許之鄭伯以璧假許田為周公祊故也

鄭公子忽逆婦媯

鄭公子忽在王所陳侯請妻之忽逆婦媯以歸陳鍼子送女先配而後祖鍼子曰是不為夫婦誣其祖矣

禮逆婦必

先告祖廟而後行故楚公子圍稱告莊共之廟鄭忽先逆婦而後告廟故曰先配而後祖

羽父請族

無駭卒羽父請諡與族公問族於衆仲對曰天子建德

因生以賜姓

若舜由媯汭故陳為媯姓

胙之土而命之氏

報之以土命氏曰陳

諸侯以字

諸侯不得賜姓故其臣因王父字

為諡因以為族

或即先入之諡為族

官有世功則有官族邑亦如之公命以字為展氏

九年

鄭伯以王命討宋

宋公不王鄭伯為王左卿士以王命討之 十年夏六

月戊申公會齊侯鄭伯于老桃壬戌公敗宋師于菅庚

金定巳后
卷一
午鄭師入郕辛未歸于我庚辰鄭師入防辛巳歸于我
君子謂鄭莊公於是乎可謂正矣以王命討不庭不貪
其土以勞王爵正之體也

鄭人大敗戎師

北戎侵鄭鄭伯禦之患戎師曰彼徒我車懼其侵軼我
也公子突曰使勇而無剛者嘗寇而速去之君為三覆
以待之戎輕而不整貪而無親勝不相讓敗不相救先
者見獲必務進進而遇覆必速奔後者不救則無繼矣

乃可以逞從之戎人之前遇覆者奔祝聃逐之衷戎師
前後擊之盡殪戎師大奔鄭人大敗戎師

十一年

滕侯薛侯爭長

滕侯薛侯來朝爭長薛侯曰我先封滕侯曰我周之卜
正也薛庶姓也我不可以後之公使羽父請於薛侯曰
周諺有之山有木工則度之賓有禮主則擇之周之宗
盟異姓為後寡人若朝于薛不敢與諸任齒君若辱貺

寡人則願以滕君為請薛侯許之乃長滕侯

鄭莊入許

鄭伯將伐許授兵于大宮公孫閱與潁考叔爭車秋七月公會齊侯鄭伯伐許庚辰傳于許潁考叔取鄭伯之旗螫弧以先登子都自下射之顛瑕叔盈又以螫弧登周麾而呼曰君登矣鄭師畢登壬午遂入許許莊公奔衛齊侯以許讓公公曰君謂許不共故從君討之許既服其罪矣雖君有命寡人弗敢與聞乃與鄭人鄭伯使

許大夫百里奉許叔以居許東偏曰天禍許國鬼神實
不逞于許君而假手于我寡人寡人唯是一二父兄不
能共億其敢以許自為功乎寡人有弟不能和協而使
餬其口於四方其況能久有許乎吾子其奉許叔以撫
柔此民也吾將使獲也佐吾子若寡人得没于地天其
以禮悔禍于許無寧茲許公復奉其社稷唯我鄭國之
有請謁焉如舊昏媾婦之父曰昏
重昏曰媾其能降以相從也無
滋他族實偏處此以與我鄭國爭此土也吾子孫其覆

亡之不暇而況能禋祀許乎寡人之使吾子處此不唯
許國之為亦聊以固吾圉也乃使公孫獲處許西偏曰
凡而器用財賄無寘於許我死乃亟去之吾先君新邑
於此王室而既卑矣周之子孫日失其序夫許大岳之
胤也天而既厭周德矣吾其能與許爭乎君子謂鄭莊
公於是乎有禮禮經國家定社稷序民人利後嗣者也
許無刑而伐之服而舍之度德而處之量力而行之相
時而動無累後人可謂知禮矣鄭伯使卒出黹行出犬

雞

百人為卒二十五人為行

以詛射穎考叔者君子謂鄭莊公失政

刑矣政以治民刑以正邪既無德政又無威刑是以及邪邪而詛之將何益矣 桓十五年許叔入于許

息侯伐鄭

鄭息有違言息侯伐鄭大敗而還君子是以知息之將亡也不度德不量力不親親不徵辭不察有罪犯五不肆而以伐人其喪師也不亦宜乎

羽父弑隱

惠公元妃孟子孟子卒繼室以聲子生隱公宋武公生仲子仲子生而有文在其手曰為魯夫人故仲子歸于我生桓公而惠公薨是以隱公立而奉之 羽父請殺桓公將以求大宰公曰為其少故也吾將授之矣使營菟裘吾將老焉羽父懼反譖公于桓公而請弑之十一月公祭鍾巫齊于社園館于寯氏壬辰羽父使賊弑公子寯氏立桓公而討寯氏有死者

桓公

十八年

二年

曲沃并晉

晉穆侯之夫人姜氏以條之役生大子命之曰仇其弟以千畝之戰生命之曰成師師服曰異哉君之名子也夫名以制義義以出禮禮以體政政以正民是以政成而民聽易則生亂嘉耦曰妃怨耦曰仇古之命也今君命大子曰仇弟曰成師始兆亂矣兄其替乎惠之二十四年晉始亂故封桓叔于曲沃師服曰吾聞國家之立

也本大而末小是以能固故天子建國諸侯立家卿置

側室

衆子也立此一官

大夫有貳宗

適為小宗次為貳宗

士有隸子弟庶

人工商各有分親皆有等衰是以民服事其上而下無
覬覦今晉甸侯也而建國本既弱矣其能久乎惠之三
十年晉潘父弑昭侯而納桓叔不克晉人立孝侯惠之
四十五年曲沃莊伯伐翼弑孝侯翼人立其弟鄂侯鄂
侯生哀侯 桓三年曲沃武公伐翼

桓叔生莊伯
莊伯生武公 逐翼

侯于汾隰驂絳而止夜獲之 七年冬曲沃伯誘晉小

子侯殺之

哀侯子

八年冬王命虢仲立晉哀侯之弟緡

于晉 莊十有六年冬王使虢公命曲沃伯以一軍為

晉侯

六年

楚子伐隨

楚武王侵隨使薳章求成焉軍於瑕以待之隨人使少師董成闕伯比言於楚子曰吾不得志於漢東也我則使然我張吾三軍而被吾甲兵以武臨之彼則懼而協

以謀我故難間也漢東之國隨為大隨張必棄小國小
國離楚之利也少師侈請羸師以張之熊率且比曰季
梁在何益闕伯比曰以為後圖少師得其君王毀軍而
納少師少師歸請追楚師隨侯將許之季梁止之曰天
方授楚楚之羸其誘我也君何急焉臣聞小之能敵大
也小道大淫所謂道忠於民而信於神也上思利民忠
也祝史正辭信也今民餒而君逞欲祝史矯舉以祭臣
不知其可也公曰吾牲牷肥腍

牷純色
完全也

塗盛豐備何則

不信對曰夫民神之主也是以聖王先成民而後致力於神故奉牲以告曰博碩肥腍謂民力之普存也謂其畜之碩大蕃滋也謂其不疾疫蠹也謂其備腍咸有也奉盛以告曰潔粢豐盛謂其三時不害而民和年豐也奉酒醴以告曰嘉栗旨酒謂其上下皆有嘉德而無違心也所謂馨香無譏慝也故務其三時修其五教

父義母慈

兄弟
恭子孝

親其九族以致其禋祀於是乎民和而神降之

福故動則有成今民各有心而鬼神之主君雖獨豐其

何福之有君姑修政而親兄弟之國庶免於難隨侯懼而修政楚不敢伐八年隨少師有寵楚鬬伯比曰可矣雖有釁不可失也夏楚子伐隨軍於漢淮之間季梁請下之弗許而後戰所以怒我而怠寇也少師謂隨侯曰必速戰不然將失楚師隨侯禦之望楚師季梁曰楚人上左君必左無與王遇且攻其右右無良焉必敗偏敗衆乃攜矣少師曰不當王非敵也弗從戰于速杞隨師敗績隨侯逸鬬丹獲其戎車與其戎右少師隨及楚

平楚子將不許鬬伯比曰天去其疾矣隨未可克也乃盟而還

昭厲之亂

北戎伐齊齊侯使乞師于鄭鄭大子忽帥師救齊大敗戎師獲其二帥大良少良甲首披甲者首三百以獻於齊公

之未昏于齊也齊侯欲以文姜妻鄭大子忽大子忽辭人問其故大子曰人各有耦齊大非吾耦也詩曰自求多福在我而已大國何為君子曰善自為謀及其敗戎

師也齊侯又請妻之固辭人問其故太子曰無事於齊
吾猶不敢今以君命奔齊之急而受室以歸是以師昏
也民其謂我何 十一年鄭昭公之敗北戎也齊人將
妻之祭仲曰君多內寵子無大援將不立三公子皆君
也弗從夏鄭莊公卒初莊公娶鄧曼生昭公祭仲立之
宋雍氏女於莊公曰雍姑生厲公雍氏宗有寵於宋莊
公故誘祭仲而執之曰不立突將死祭仲與宋人盟歸
而立之昭公奔衛 十五年祭仲專鄭伯患之使其壻

雍糾殺之將享諸郊雍姬知之謂其母曰父與夫孰親其母曰人盡夫也父一而已胡可比也遂告祭仲曰雍氏舍其室而將享子於郊吾惑之祭仲殺雍糾公載以出曰謀及婦人宜其死也夏厲公奔蔡六月昭公入秋鄭伯因櫟人殺檀伯而遂居櫟十七年初鄭伯將以高渠彌為卿昭公惡之固諫不聽昭公立懼其殺已也弑昭公而立公子亯君子謂昭公知所惡矣公子達曰高伯其為戮乎復惡已甚矣十八年秋齊侯師于首

止子亶會之高渠彌相齊人殺子亶而輟高渠彌祭仲
逆鄭子于陳而立之是行也祭仲知之故稱疾不往人
曰祭仲以知免仲曰信也 莊十四年鄭厲公自櫟侵
鄭獲傅瑕傅瑕曰苟舍我吾請納君與之盟而赦之六
月傅瑕殺鄭子及其二子而納厲公初內蛇與外蛇鬪
於鄭南門中內蛇死六年而厲公入公問於申繻曰猶
有妖乎對曰人之所忌其氣燄以取之妖由人興也人
無釁焉妖不自作人棄常則妖興故有妖厲公入遂殺

傳瑕使謂原繁曰傳瑕貳既伏其罪矣納我而無貳心者吾皆許之上大夫之事吾願與伯父圖之且寡人出伯父無裏言入又不念寡人寡人憾焉對曰先君桓公命我先人典司宗祏社稷有主而外其心其何貳如之苟主社稷國內之民其誰不為臣臣無二心天之制也子儀在位十四年矣而謀召君者庸非貳乎莊公之子猶有八人若皆以官爵行賂勸貳而可以濟事君其若之何臣聞命矣乃縊而死十六年鄭伯治與於雍糾

之亂者殺公子闕則彊鉏公父定叔出奔衛

段之孫

三年

而復之曰不可使共叔無後於鄭使以十月入曰良月也就盈數焉君子謂彊鉏不能衛其足

子同生

子同生以大子生之禮舉之接以大牢卜士負之士妻食之公與文姜宗婦命之公問名於申繻對曰名有五有信有義有象有假有類以名生為信

如公子友

以德命為

義

文王昌武王發

以類命為象

若孔子首象尼丘

取於物為假

若伯魚因饋魚

名曰

取於父為類子不以國不以官不以山川不以隱

疾不以畜牲不以器幣周人以諱事神名終將諱之故

以國則廢名以官則廢職以山川則廢主以畜牲則廢

祀以器幣則廢禮晉以僖侯廢司徒僖名司徒改為中軍宋以武

公廢司空

改以司城

先君獻武廢二山是以大物不可以命

公曰是其生也與吾同物命之曰同

九年

曹大子來朝

曹大子來朝享之初獻樂奏而歎施父曰曹大子其有
憂乎非歎所也 十年春曹桓公卒

十年

虞叔伐虞公

虞叔有玉虞公求旃弗獻既而悔之曰匹夫無罪懷璧
其罪吾焉用此其以賈害也乃獻之又求其實劔叔曰
是無厭也無厭將及我遂伐虞公虞公奔共池

十一年

屈瑕敗師

楚屈瑕將盟貳軫鄖人軍於蒲騷將與隨絞州蓼伐楚師莫敖患之鬬廉曰鄖人軍其郊必不誠且日虞四邑之至也君次於郊郢以禦四邑我以銳師宵加於鄖鄖有虞心而恃其城莫有鬬志若敗鄖師四邑必離莫敖曰盍請濟師于王對曰師克在和不在衆商周之敵君之所聞也成軍以出又何濟焉莫敖曰卜之對曰卜以決疑不疑何卜遂敗鄖師于蒲騷卒盟而還 十二

年楚伐絞軍其南門莫敖曰絞小而輕輕則寡謀請無
扞采樵者以誘之從之絞人獲三十人明日絞人爭出
驅楚役徒於山中楚人坐其北門而覆諸山下大敗之
為城下之盟而還伐絞之役楚師分涉於彭羅人欲伐
之使伯嘉謀之三巡數之十三年楚屈瑕伐羅鬬伯
比送之還謂其御曰莫敖必敗舉趾高心不固矣遂見
楚子曰必濟師楚子入告夫人鄧曼鄧曼曰大夫其非
衆之謂其謂君撫小民以信訓諸司以德而威莫敖以

刑也莫敖狃於蒲騷之役將自用也必小羅君若不鎮撫其不設備乎夫固謂君訓衆而好鎮撫之召諸司而勸之以令德見莫敖而告諸天之不假易也不然夫豈不知楚師之盡行也莫敖徇于師曰諫者有刑及馭亂次以濟且不設備及羅羅與盧戎兩軍之大敗之莫敖縊于荒谷羣帥囚于冶父以聽刑楚子曰孤之罪也皆免之

十六年

急壽相死

衛宣公烝於夷姜生急子屬諸右公子為之娶於齊而美公取之生壽及朔屬壽於左公子宣姜與公子朔構急子公使諸齊使盜待諸莘將殺之壽子告之使行不可曰棄父之命惡用子矣有無父之國則可也及行飲以酒壽子載其旌以先盜殺之急子至曰我之求也此何罪又殺之二公子故怨惠公立公子黔牟惠公奔齊莊六年夏衛侯入放公子黔牟于周放甯跪于秦殺

左公子洩右公子職乃即位君子以二公子之立黔牟為不度矣夫能固位者必度於本末而後立衷焉不知其本不謀知本之不枝弗彊詩云本枝百世

十七年

及齊師戰于奚

及齊師戰于奚疆事也於是齊人侵魯疆疆吏來告公曰疆場之事慎守其一而備其不虞姑盡所備焉事至而戰又何謁焉

十八年

桓公薨于齊

公將與姜氏如齊申繻曰女有家男有室無相瀆也易
此必敗公會齊侯于濼

盧篤力角二反又音洛

遂及文姜如齊齊

侯通焉公謫之以告夏四月享公使公子彭生乘公

車上

曰公薨于車魯人告于齊曰寡君來修舊好禮成而不

反無所歸咎惡於諸侯請以彭生除之齊人殺彭生

王殺周公黑肩

周公欲弑莊王而立王子克

莊王弟

辛伯告王遂與王殺

周公黑肩克奔燕初子儀有寵於桓王桓王屬諸周公

辛伯諫曰並后匹嫡兩政

臣擅命

耦國亂之本也周公弗

從故及

莊公

四年

楚武王伐隨卒

楚武王荆尸授師子

言熟反方言楚以戰為子

焉以伐隨將齊入告

夫人鄧曼曰余心蕩鄧曼歎曰王祿盡矣盈而蕩天之
道也先君其知之矣故臨武事將發大命而蕩王心焉
若師徒無虧王薨于行國之福也王遂行卒於楸木之
下令尹闢初莫敖屈重除道梁澆營軍臨隨隨人懼行
成莫敖以王命入盟隨侯且請為會於漢汭而還濟漢
而後發喪

六年

楚滅鄧

楚文王伐申過鄧鄧初侯曰吾甥也止而享之驢甥聃甥養甥請殺楚子鄧侯弗許三甥曰亡鄧國者必此人也若不蚤圖後君噬齊其及圖之乎鄧侯曰人將不食吾餘對曰若不從三臣抑社稷實不血食而君焉取餘弗從還年楚子伐鄧十六年楚復伐鄧滅之

八年

齊師圍郕

師及齊師圍郕郕降于齊師仲慶父請伐齊師公曰我

實不德齊師何罪罪我之由夏書曰臯陶邁種德德乃降姑務修德以待時乎君子是以善莊公齊侯使連稱管至父戍葵丘瓜時而往曰及瓜而代期戍公問不至請代弗許故謀作亂僖公之母弟曰夷仲年生公孫無知有寵於僖公衣服禮秩如適襄公絀之二人因之以作亂齊侯田于貝丘見大豕從者曰公子彭生也公怒曰彭生敢見射之豕人立而啼公懼隊于車傷足喪屨反誅屨於徒人費弗得鞭之見血走出遇賊于門刼

而束之費袒而示之背請先入伏公而出鬪死於門中
石之紛如死于階下遂入殺孟陽于床曰非君也不類
見公之足于户下遂弑之而立無知初襄公立無常鮑
叔牙曰君使民慢亂將作矣奉公子小白出奔莒亂作
管夷吾召忽奉公子糾來奔初公孫無知虐于雍廩
九年雍廩殺無知公伐齊納子糾桓公自莒先入師及
齊師戰于乾時我師敗績公喪戎路傳乘而歸鮑叔帥
師來言曰子糾親也請君討之管召讎也請受而甘心

焉乃殺子糾于生竇召忽死之管仲請囚鮑叔受之及
堂阜而稅之歸而以告曰管夷吾治於高偁使相可也
公從之 十年齊師伐我公將戰曹劌請見問何以戰
公曰衣食所安弗敢專也必以分人對曰小惠未徧民
弗從也公曰犧牲玉帛弗敢加也必以信對曰小信未
孚神弗福也公曰小大之獄雖不能察必以情對曰忠
之屬也可以一戰戰則請從公與之乘戰于長勺公將
鼓之劌曰未可齊人三鼓劌曰可矣齊師敗績公將馳

之剡曰未可下視其轍登軾而望之曰可矣遂逐齊師
既克公問其故對曰夫戰勇氣也一鼓作氣再而衰三
而竭彼竭我盈故克之夫大國難測也懼有伏焉吾視
其轍亂望其旗靡故逐之夏齊師宋師次于郎公子偃
曰宋師不整可敗也宋敗齊必還請擊之公弗許自雩
門竊出蒙臯比虎皮而先犯之公從之大敗宋師于乘丘
齊師乃還

十三年公會齊侯盟于柯始及齊平也

十年

楚子入蔡

蔡哀侯娶于陳息侯亦娶焉息媯將歸過蔡蔡侯曰吾
媿也止而見之弗賓息侯怒使謂楚文王曰伐我吾求
救於蔡而伐之楚子從之敗蔡師于莘以蔡侯獻舞歸
十四年蔡哀侯為莘故繩息媯以語楚子楚子滅息
以息媯歸生堵敖及成王焉未言楚子問之對曰吾一
婦人而事二夫縱不能死其又奚言楚子以蔡侯滅息
遂入蔡君子曰商書所謂惡之易也如火之燎于原不

可卿邇其猶可撲滅者其如蔡哀侯乎

十一年

宋立桓公

宋大水公使弔焉曰天作淫雨害於粢盛若之何不弔
對曰孤實不敬天降之災又以為君憂拜命之辱臧文
仲曰宋其興乎禹湯罪已其興也悖焉悖盛也桀紂罪人

其亡也忽焉且列國有凶稱孤禮也言懼而名禮其庶
乎既而聞之曰公子御說之辭也臧孫達曰是宜為君

有恤民之心乘丘之役

年十

公以金僕姑

矢名

射南宮長萬

公右欬

市專

孫生搏之宋人請之宋公靳之曰始吾敬子

今子魯囚也吾弗敬子矣病之

戲而相愧曰靳

十二年宋萬

弑閔公于蒙澤立子游蕭叔大心及戴武宣穆莊之族

殺子游于宋立桓公

御說

齊桓征伐盟會

齊侯之出也過譚譚不禮焉及其入也諸侯皆賀譚又

不至齊師滅譚譚無禮也

見十年

十三年春齊侯宋人

陳人蔡人邾人會于北杏以平宋亂遂人不至齊人滅
遂而戍之宋人背北杏之會 十四年冬單伯會齊侯
宋公衛侯鄭伯于鄆宋服故也 十五年齊侯宋公陳
侯衛侯鄭伯會于鄆齊始霸也 秋宋人齊人邾人伐
邾鄭人間之而侵宋 十六年冬會齊侯宋公陳侯衛
侯鄭伯許男滑伯滕子同盟于幽鄭成也 十七年夏
遂因氏頌氏工婁氏須遂氏饗齊戍醉而殺之齊人殲
焉 二十七年夏會齊侯宋公陳侯鄭伯同盟于幽陳

鄭服也

二十二年陳亂而齊納敬仲二十五年鄭文公之四年獲成於楚皆有二心今始服也

冬王使召伯廖賜齊侯命且請伐衛以其立子頹也

二十八年春齊侯敗衛師數之以王命取賂而還 三

十年秋齊人降鄆 冬公及齊侯遇于魯濟謀山戎也

以其病燕故也齊人伐山戎 三十一年齊侯來獻戎

捷非禮也凡諸侯有四夷之功則獻于王王以警于夷

中國則否諸侯不相遺俘 閔二年春齊人遷陽 僖

二年秋盟于貫服江黃也齊寺人貂始漏師于多魚

三年秋齊侯宋公江人黃人會于陽穀謀伐楚也齊侯
與蔡姬乘舟于圉蕩公公懼變色禁之不可公怒歸之
未絕之也蔡人嫁之 四年春齊侯以諸侯之師侵蔡
蔡潰遂伐楚楚子使與師言曰君處北海寡人處南海
唯是風馬牛不相及也不虞君之涉吾地也何故管仲
對曰昔召康公命我先君太公曰五侯九伯女實征之
以夾輔周室賜我先君履東至于海西至于河南至于
穆陵北至于無棣爾貢包茅不入王祭不共無以縮酒

寡人是徵昭王南征不復寡人是問對曰貢之不入寡君之罪也敢不共給昭王之不復君其問諸水濱師進次于涇楚子使屈完如師師退次于召陵齊侯陳諸侯之師與屈完乘而觀之齊侯曰宜不穀是為先君之好是繼與不穀同好如何對曰君惠徼福於敝邑之社稷辱收寡君寡君之願也齊侯曰以此衆戰誰能禦之以此攻城何城不克對曰君若以德綏諸侯誰敢不服君若以力楚國方城以為城漢水以為池雖衆無所用之

屈完及諸侯盟 五年夏公及齊侯宋公陳侯衛侯鄭
伯許男曹伯會王世子于首止謀寧周也秋諸侯盟鄭
伯逃其師而歸 七年秋盟于甯母謀鄭故也管仲言
於齊侯曰臣聞之招攜以禮懷遠以德德禮不易無人
不懷齊侯修禮於諸侯諸侯官受方物 八年春盟于
洮謀王室也 定襄王位 鄭伯乞盟請服也 九年夏會于葵
丘尋盟且修好禮也王使宰孔賜齊侯胙曰天子有事
于文武使孔賜伯舅胙齊侯將下拜孔曰且有後命天

子使孔曰以伯舅耄老加勞賜一級無下拜對曰天威
不遠顏咫尺小白余敢貪天子之命無下拜恐隕越于
下以遺天子羞敢不下拜下拜登受秋齊侯盟諸侯于
葵丘宰孔先歸遇晉侯曰可無會也齊侯不務德而勤
遠略故北伐山戎南伐楚西為此會也東略之不知西
則否矣其在亂乎君務靖亂無勤於行 十三年夏會
于鹹淮夷病杞故且謀王室也秋為戎難故諸侯戍周
十四年春諸侯城緣陵而遷杞焉不書其人有闕也

十五年春楚人伐徐公會齊侯宋公陳侯衛侯鄭伯
許男曹伯盟于牡丘尋葵丘之盟且救徐也 十六年
公會齊侯宋公陳侯衛侯鄭伯許男邢侯曹伯于淮謀
鄆且東略也城鄆役人病有夜登丘而呼曰齊有亂不
果城而還 十七年齊侯之夫人三王姬徐嬴蔡姬皆
無子齊侯多內寵內嬖如夫人者六人長衛姬生武孟
少衛姬生惠公鄭姬生孝公葛嬴生昭公密姬生懿公
宋華子生公子雍公與管仲屬孝公於宋襄公以為大

子雍巫有寵於衛共姬因寺人貂以薦羞於公亦有寵
公許之立武孟管仲卒五公子皆求立桓公卒易牙與
寺人貂因內寵以殺羣吏而立公子無虧孝公奔宋

十八年齊人將立孝公不勝四公子之徒遂與宋人戰

宋敗齊師于鹹

魚免反又言彥二音

立孝公而還 十九年陳穆

公請修好於諸侯以無忘齊桓之德冬會陳人蔡人楚
人鄭人盟于齊修桓公之好也

十八年

虢公晉侯朝王

虢公晉侯朝王王饗醴命之宥皆賜玉五穀

雙玉為穀

馬三

匹非禮也王命諸侯名位不同禮亦異數不以禮假人

鬻拳自殺

楚武王克權遷權於郢處使閻敖尹之及文王即位與巴人伐申而驚其師巴人叛楚而伐郢處取之閻敖游涌而逸楚子殺之其族為亂巴人因之以伐楚十九年楚子禦之大敗於津還鬻拳

楚大閻

弗納遂伐黃還及

春秋左傳卷一
秋卒鬻拳葬諸夕室亦自殺也而葬於經皇

冢前闕

初鬻

拳彊諫楚子楚子弗從臨之以兵懼而從之鬻拳曰吾懼君以兵罪莫大焉遂自刎也楚人以為大閹謂之大伯使其後掌之君子曰鬻拳可謂愛君矣諫以自納於刑刑猶不忘納君於善

十九年

五大夫立子頹

初王姚嬖于莊王生子頹子頹有寵為國為之師惠王

即位取為國之圃邊伯之宮近於王宮王取之王奪子

禽祝跪與詹父田而收膳夫之秩

石速

故為國邊伯石速

詹父子禽祀跪作亂因蘇氏秋五大夫奉子頹以伐王

桓王奪蘇氏十二邑與鄭故自以此以來不和

冬立子頹

二十年鄭伯和王

室不克遂以王歸王處于櫟王子頹享五大夫樂及徧
舞鄭伯聞之見虢叔曰寡人聞之哀樂失時殃咎必至
今子頹歌舞不倦樂禍也夫司寇行戮君為之不舉而
況敢樂禍乎奸王之位禍孰大焉臨禍忘憂憂必及之

盍納王乎虢公曰寡人之願也二十一年同伐王城

鄭伯將王自圉門入虢叔自北門入殺王子頽及五大夫鄭伯享王于闕西辟樂備王與之武公之略自虎牢以東原伯曰鄭伯效尤其亦將有咎五月鄭厲公卒鄭伯之享王也王以后之輦鑑予之虢公請器王予之爵

鄭伯由是始惡於王

為僖二十四年
鄭執王使張本

二十二年

陳敬仲辭卿

陳人殺其大子御寇陳公子完與顓孫奔齊齊侯使敬仲為卿辭曰羈旅之臣幸若獲宥及於寬政赦其不閑於教訓而免於罪戾弛於負擔君之惠也所獲多矣敢辱高位以速官謗請以死告詩云翹翹車乘招我以弓宜不欲往畏我友朋使為工正飲桓公酒樂公曰以火繼之辭曰臣卜其晝未卜其夜不敢君子曰酒以成禮不繼以淫義也以君成禮弗納於淫仁也初懿氏卜妻敬仲其妻占之曰吉是謂鳳皇于飛和鳴鏘鏘有媯之

後將育于姜五世其昌並於正卿八世之後莫之與京
陳厲公蔡出也故蔡人殺五父而立之生敬仲其少也

周史有以周易見陳侯者陳侯使筮之遇觀



坤下
巽上

之否



坤下
乾上

曰是謂觀國之光利用賓于王此其代

陳有國乎不在此其在異國非此其身在其子孫光遠

而自他有耀者也坤土也巽風也乾天也風為天於土

上山也

自二至四有
艮象艮為山

有山之材而照之以天光於是乎

居土上故曰觀國之光利用賓于王庭實旅百奉之以

玉帛天地之美具焉故曰利用賓于王猶有觀焉故曰
其在後乎風行而著於土故曰其在異國乎若在異國
必姜姓也姜大嶽之後也山嶽則配天物莫能兩大陳
衰此其昌乎及陳之初亡也陳桓子始大於齊其後亡
也成子得政

二十三年

公如齊觀社

公如齊觀社曹劌諫曰不可夫禮所以整民也故會以

訓上下之則制財用之節朝以正班爵之義帥長幼之序征伐以討其不然諸侯有王王有巡狩以大習之非是君不舉矣君舉必書書而不法後嗣何觀

晉去桓莊之族

晉桓莊之族偪獻公患之士為曰去富子則羣公子可謀也已公曰爾試其事士為與羣公子謀譖富子而去之二十四年晉士為又與羣公子謀使殺游氏之二子士為告晉侯曰可矣不過二年君必無患 二十五

年晉士爲使羣公子盡殺游氏之族乃城聚而處之冬
晉侯圍聚盡殺羣公子

丹桓宮之楹

秋丹桓宮之楹 二十四年春刻其桷皆非禮也御孫
諫曰臣聞之儉德之共也侈惡之大也先君有共德而
君納諸大惡無乃不可乎秋哀姜至公使宗婦覲用幣
御孫曰男贄大者玉帛小者禽鳥以章物也女贄不過
榛栗棗脩以告處也今男女同贄是無別也男女之別

國之大節也而由夫人亂之無乃不可乎

二十六年

晉滅虞虢

秋虢人侵晉冬虢人又侵晉 二十七年晉侯將伐虢
士蒍曰不可虢公驕若驟得勝於我必棄其民無衆而
後伐之欲禦我誰與夫禮樂慈愛戰所畜也夫民讓事
樂和愛親哀喪而後可用也虢弗畜也亟戰將饑 三
十二年秋有神降于莘惠王問諸內史過曰是何故也

對曰國之將興明神降之監其德也將亡神又降之觀其惡也故有得神以興亦有以亡虞夏商周皆有之王曰若之何對曰以其物享焉其至之日亦其物也

若以甲乙

至祭先脾玉用蒼服上青以此類推之

王從之內史過往聞虢請命反曰

虢必亡矣虐而聽於神神居莘虢公使祝應宗區史嚚享焉神賜之土田史嚚曰虢其亡乎吾聞之國將興聽於民將亡聽於神神聰明正直而壹者也依人而行虢多涼德其何土之能得 閔二年虢公敗犬戎于渭汭

舟之僑曰無德而祿殃也殃將至矣遂奔晉 僖二年
晉荀息請以屈產之乘與垂棘之璧假道於虞以伐虢
公曰是吾寶也對曰若得道於虞猶外府也公曰宮之
奇存焉對曰宮之奇之為人也懦而不能彊諫且少長
於君君暱之雖諫將不聽乃使荀息假道於虞虞公許
之且請先伐虢宮之奇諫不聽夏晉里克荀息帥師會
虞師伐虢滅下陽秋虢公敗戎于桑田晉卜偃曰虢必
亡矣亡下陽不懼而又有功是天奪之鑒而益其疾必

易晉而不撫其民矣不可以五稔 五年晉侯復假道於虞以伐虢宮之奇諫曰虢虞之表也虢亡虞必從之晉不可啓寇不可翫一之謂甚其可再乎諺所謂輔車相依脣亡齒寒者其虞虢之謂也公曰晉吾宗也豈害我哉對曰大伯虞仲大王之昭也虢仲虢叔王季之穆也為文王卿士勲在王室藏於盟府將虢是滅何愛於虞且虞能親於桓莊乎其愛之也桓莊之族何罪而以為戮不唯偏乎親以寵偏猶尚害之況以國乎公曰吾

享祀豐潔神必據我對曰臣聞之鬼神非人實親惟德是依故周書曰皇天無親唯德是輔又曰黍稷非馨明德惟馨又曰民不易物唯德馨物如是則非德民不神不享矣神所馮依將在德矣若晉取虞而明德以薦馨香神其吐之乎弗聽宮之奇以其族行曰虞不臘矣八月甲午晉侯圍上陽問於卜偃曰吾其濟乎對曰克之公曰何時對曰童謡云丙之晨龍尾伏辰

龍尾星日月所會

曰辰日在尾故尾伏不見

均服振振取虢之旂鶉之賁賁天策焯焯

火中成軍虢公其奔其九月十月之交乎

賁賁鶉火之體煇不明也

天策一說星時近日故不明

丙子旦日在尾月在策

月行疾故至旦已在策

鶉

火中必是時也冬十二月丙子朔晉滅虢師還館于虞遂襲虞滅之修虞祀且歸其職貢於王

二十八年

驪姬之難

晉獻公娶于賈無子烝於齊姜生秦穆夫人及大子申生又娶二女於戎大戎狐姬生重耳小戎子生夷吾晉

伐驪戎驪戎男女以驪姬歸生奚齊其娣生卓子驪姬

嬖欲立其子賂外嬖梁五與東闕嬖五使言於公曰曲

沃君之宗也蒲與二屈

二當為北平陽北屈縣

君之疆也不可以

無主宗邑無主則民不威疆場無主則啓戎心戎之生

心民慢其政國之患也若使大子主曲沃而重耳夷吾

主蒲與屈則可以威民而懼戎且旌君伐使俱曰狄之

廣莫於晉為都晉之啓土不亦宜乎晉侯說之夏使大

子居曲沃重耳居蒲城夷吾居屈羣公子皆鄙唯二姬

之子在絳二五卒與驪姬譖羣公子而立奚齊晉人謂之二五耦 閔元年晉侯作二軍公將上軍大子申生將下軍以滅耿滅霍滅魏還為大子城曲沃士為曰大子不得立矣分之都城而位以卿先為之極又焉得立不如逃之無使罪至為吳大伯不亦可乎猶有令名與其及也且諺曰心苟無瑕何恤乎無家天若祚大子其無晉乎 二年晉侯使大子申生伐東山臯落氏里克諫曰大子奉冢祀社稷之粢盛以朝夕視君膳者也故

曰冢子君行則守有守則從從曰撫軍守曰監國古之制也夫帥師專行謀誓軍旅君與國政之所圖也非大子之事也師在制命而已稟命則不威專命則不孝故君之嗣適不可以帥師君失其官帥師不威將焉用之且臣聞臯落氏將戰君其舍之公曰寡人有子未知其誰立焉不對而退見大子大子曰吾其廢乎對曰告之以臨民教之以軍旅不共是懼何故廢乎且子懼不孝無懼弗得立修已而不責人則免於難大子帥師公衣

之偏衣佩之金玦狐突御戎先友為右梁餘子養御罕
夷先丹木為右羊舌大夫為尉先友曰衣身之偏握兵
之要在此行也偏躬無慝兵要遠災親以無災又何患
焉狐突歎曰時事之微也衣身之章也佩衷之旗也故
敬其事則命以始服其身則衣之純用其衷則佩之度
今命以時卒閱其事也衣之厖服遠其躬也佩以金玦
棄其衷也服以遠之時以閱之厖涼冬殺金寒玦離胡
可恃也雖欲勉之狄可盡乎梁餘子養曰帥師者受命

於廟受服於社有常服矣不獲而尤命可知也死而不
孝不如逃之罕夷曰尤奇無常金玦不復雖復何為君
有心矣先丹木曰是服也狂夫阻之曰盡敵而反敵可
盡乎不如違之狐突欲行羊舌大夫曰不可違命不孝
棄事不忠雖知其寒惡不可取子其死之太子將戰狐
突諫曰不可亂本成矣立可必乎孝而安民子其圖之
全身為孝不
戰為安民 與其危身以速罪也 有功見害
是為速罪 僖四年
初晉獻公欲以驪姬為夫人卜之不吉筮之吉公曰從

筮卜人曰筮短龜長不如從長且其繇曰專之渝攘公

之瑜

音渝渝變也瑜美也言變乃除公之美

一薰一蕕十年尚猶有臭必

不可弗聽生奚齊及將立之既與中大夫成謀姬謂大
子曰君夢齊姜必速祭之天子祭于曲沃歸胙于公公
田姬寘諸宮六日公至毒而獻之公祭之地地墳與犬
犬斃與小臣小臣亦斃姬泣曰賊由天子或謂大子子
辭君必辨焉大子曰君非姬氏居不安食不飽我辭姬
必有罪君老矣吾又不樂曰子其行乎大子曰君實不

察其罪被此名也以出人誰納我縊于新城姬譖二公子曰皆知之重耳奔蒲夷吾奔屈五年初晉侯使士蒍為二公子築蒲與屈不慎寘薪焉夷吾訴之公使讓之士蒍稽首而對曰臣聞之無喪而感憂必讎焉無戎而城讎必保焉寇讎之保又何慎焉守官廢命不敬固讎之保不忠失忠與敬何以事君詩云懷德惟寧宗子惟城君其修德而固宗子何城如之三年將尋師焉焉用慎退而賦曰狐裘尫茸一國三公吾誰適從及難公

使寺人披伐蒲重耳曰君父之命不校踰垣而走披斬其袪遂出奔翟 六年晉侯使賈華伐屈夷吾不能守盟而行將奔狄卻芮曰不如之梁梁近秦而幸焉乃之梁 九年晉獻公卒里克平鄭欲納文公故以三公子之徒作亂初獻公使荀息傅奚齊公疾召之曰以是藐諸孤辱在大夫其若之何稽首而對曰臣竭其股肱之力加之以忠貞其濟君之靈也不濟則以死繼之公曰何謂忠貞對曰公家之利知無不為忠也送往事居耦

俱無猜貞也及里克將殺奚齊先告荀息曰三怨將作秦晉輔之子將何如荀息曰將死之里克曰無益也荀叔曰吾與先君言矣不可以貳能欲復言而愛身乎十月里克殺奚齊于次荀息將死之人曰不如立卓子而輔之荀息立公子卓以葬十一月里克殺卓于朝荀息死之君子曰詩所謂白圭之玷尚可磨也斯言之玷不可為也荀息有焉

申公闕班殺子元

楚令尹子元欲盡文夫人為館於其宮側而振萬焉夫
人聞之泣曰先君以是舞也習戎備也今令尹不尋諸
仇讎而於未亡人之側不亦異乎御人以告子元子元
曰婦人不亡襲讎我反忘之子元以車六百乘伐鄭諸
侯救鄭楚師夜遁三十年子元歸自伐鄭而處王宮
申公闢班殺子元闢殺走奴於菟為令尹自毀其家以紓
楚國之難

三十二年

共仲弑子般立閔公

公疾問後於叔牙對曰慶父材問於季友對曰臣以死奉般公曰鄉者牙曰慶父材成季使以君命命僖叔待于鍼巫氏使鍼季酖之曰飲此則有後於魯國不然死且無後飲之歸及遼泉而卒立叔孫氏八月公薨子般即位共仲使圉人犖賊子般于黨氏成季奔陳立閔公閔元年公及齊侯盟于落姑請復季友也齊侯許之使召諸陳公次于卽以待之冬齊仲孫湫來省難仲

孫歸曰不去慶父魯難未已公曰若之何而去之對曰
難不已將自斃君其待之公曰魯可取乎對曰不可猶
秉周禮周禮所以本也臣聞之國將亡本必先顛而後
枝葉從之魯不棄周禮未可動也君其務寧魯難而親
之親有禮因重固間攜貳覆昏亂霸王之器也 二年
秋共仲使卜畸魚魚賊公于武闡成季以僖公適邾共仲
奔莒乃入立之以賂求共仲于莒莒人歸之及密使公
子魚請不許哭而往共仲曰奚斯之聲也乃縊閔公哀

姜之姊叔姜之子也故齊人立之共仲通於哀姜哀姜欲立之閔公之死也哀姜與知之故孫于邾齊人取而殺之于夷以其尸歸僖公請而葬之成季之將生也桓公使卜楚丘之父卜之曰男也其名曰友在公之右間于兩社為公室輔

周社亳社之間朝廷執政所在

季氏亡則魯不昌又

筮之遇大有



乾下離上

之乾曰同復于父敬如君所

乾為

君父離變為乾故曰同復於父其見敬與君同

及生有文在其手曰友遂以命

之僖元年冬莒人來求賂公子友敗諸鄆公賜季友

汶陽之田及費

閔公

元年

邢遷夷儀

狄人伐邢管敬仲言於齊侯曰戎狄豺狼不可厭也諸
夏親暱不可棄也宴安酖毒不可懷也詩云宜不懷歸
畏此簡書簡書同惡相恤之謂也請救邢以從簡書齊
人救邢僖元年春諸侯救邢邢人潰出奔師師遂逐

狄人具邢器用而遷之師無師焉夏邢遷于夷儀齊師
宋師曹師城之

晉侯作二軍

晉侯作二軍公將上軍大子申生將下軍趙夙御戎畢
萬為右以滅耿滅霍滅魏還賜趙夙耿賜畢萬魏卜偃
曰畢萬之後必大萬盈數也魏大名也以是始賞天啓
之矣天子曰兆民諸侯曰萬民今名之大以從盈數其
必有衆初畢萬筮仕於晉遇屯



震下

坎上

之比



坤下

坎上辛廖占之曰吉屯固比入吉孰大焉屯險難故堅固比親密故得入

其必蕃昌震為土

震為坤

車從馬

震為車坤為馬

足居之兄長之

母覆之衆歸之六體不易合而能固安而能殺公侯之卦也

二年

齊封衛楚丘

冬狄人伐衛衛懿公好鶴鶴有乘軒者將戰國人受甲者皆曰使鶴鶴實有祿位余焉能戰公與石祁子玦與

甯莊子矢使守曰以此贊國擇利而為之與夫人繡衣
曰聽於二子及狄人戰于熒澤衛師敗績狄人囚史華
龍滑與禮孔以逐衛人二人曰我大史也實掌其祭不
先國不可得也

狄畏鬼神故恐言先白神

乃先之至則與國人出狄

從之又敗諸河初惠公之即位也少齊人使昭伯烝於

宣姜

昭伯公子頑

生齊子戴公文公宋桓夫人許穆夫人文

公為衛之多患也先適齊及敗宋桓公逆諸河宵濟衛
之遺民男女七百有三十人益之以共滕之民為五千

人立戴公以廬于曹齊侯使公子無虧帥車三百乘甲士三千人以戌曹歸公乘馬祭服五稱牛羊豕雞狗皆三百與門材歸夫人魚軒重錦三十兩

以二丈雙行故曰兩三十兩三

也

僖之元年齊桓公遷邢于夷儀二年封衛于楚丘

邢遷如歸衛國忘亡衛文公大布之衣大帛之冠務材訓農通商惠工敬教勸學授方任能元年革車三十乘季年乃三百乘

僖公

四年

鄭殺申侯

齊侯以諸侯之師伐楚陳轅濤塗謂鄭申侯曰師出於陳鄭之間國必甚病若出於東方觀兵於東夷循海而歸其可也申侯曰善濤塗以告齊侯許之申侯曰師老矣若出於東方而遇敵懼不可用也若出於陳鄭之間共其資糧罪草履其可也齊侯說與之虎牢執轅濤塗秋伐陳討不忠也五年陳轅宣仲怨鄭申侯之反

已於召陵故勸之城其賜邑曰美城之大名也子孫不
忘吾助子請乃為之請於諸侯而城之美遂諧諸鄭伯
曰美城其賜邑將以叛也申侯由是得罪 七年鄭殺
申侯初申侯申出也有寵於楚文王文王將死與之璧
使行曰唯我知女女專利而不厭予取予求不女疵瑕
也後之人將求多於女女必不免我死女必速行無適
小國將不女容焉既葬出奔鄭又有寵於厲公子文聞
其死也曰古人有言曰知臣莫若君弗可改也已

五年

鄭殺大子華 周子帶之亂

會于首止會王大子鄭謀寧周也秋諸侯盟王使周公
召鄭伯曰吾撫女以從楚輔之以晉可以少安鄭伯喜
於王命而懼其不朝於齊也故逃歸不盟孔叔止之曰
國君不可以輕遣政輕則失親失親患必至病而乞盟所
喪多矣君必悔之弗聽 七年春齊人伐鄭孔叔言於
鄭伯曰諺有之曰心則不競何憚於病既不能彊又不

能弱所以斃也國危矣請下齊以救國公曰吾知其所
由來矣姑少待我對曰朝不及夕何以待君夏鄭殺申
侯以說于齊秋盟于甯母謀鄭故也鄭伯使太子華聽
命于會言於齊侯曰洩氏孔氏子人氏三族實違君命
君若去之以為成我以鄭為內臣君亦無所不利焉齊
侯將許之管仲曰君以禮與信屬諸侯而以姦終之無
乃不可乎子父不奸之謂禮守命共時之謂信違此二
者姦莫大焉公曰諸侯有討於鄭未捷今苟有釁從之

不亦可乎對曰君若綏之以德加之以訓辭而帥諸侯以討鄭鄭將覆亡之不暇若總其罪人以臨之鄭有辭矣且夫合諸侯以崇德也會而列姦何以示後嗣夫諸侯之會其德刑禮義無國不記記姦之位君盟替矣作而不記非盛德也君其勿許鄭必受盟夫子華既為大子而求介於大國以弱其國亦必不免鄭有叔詹堵叔師叔三良為政未可間也齊侯辭焉子華由是得罪於鄭 八年春盟于洮鄭伯乞伯請服也 十六年冬鄭

殺子華 會于首止 會王太子鄭伯寧周也 七年閏
月惠王崩襄王惡大叔帶之難懼不立不發喪而告難
于齊 八年春盟于洮謀王室也襄王定位而後發喪
十一年夏揚拒泉臯伊雒之戎同伐京師王子帶召
之也秦晉伐戎以救周 十二年王以戎難故討王子
帶秋王子帶奔齊冬齊侯使管夷吾平戎于王使隰朋
平戎于晉王以上卿之禮饗管仲管仲辭曰臣賤有司
也有天子之二守國高在若節春秋來承王命何以禮

金史卷一百一十五
卷一
焉陪臣敢辭王曰舅氏余嘉乃勲應乃懿德謂督不忘
往踐乃職無逆朕命管仲受下卿之禮而還君子曰管
仲之世祀也宜哉讓不忘其上詩曰愷悌君子神所勞
矣十三年春齊侯使仲孫湫聘于周且言王子帶事
畢不與王言歸復命曰未可王怒未怠其十年乎不十
年王弗召也夏會于鹹謀王室也為戎難故諸侯戍周
二十二年富辰言于王曰請召大叔詩曰協比其鄰
昏姻孔云吾兄弟之不協焉能怨諸侯之不睦王說王

子帶自齊復歸于京師王召之也 二十四年甘昭公

通於隗氏王替隗氏

狄

顏叔桃子遂奉大叔以狄師攻

王王御士將禦之王曰先后其謂我何寧使諸侯圖之
王遂出及坎欲國人納之秋狄大敗周師王出適鄭處
于汜大叔以隗氏居于溫王使來告難曰不穀不德得
罪于母弟之寵子帶鄙在鄭地汜敢告叔父臧文仲對
曰天子蒙塵于外敢不奔問官守王使簡師父告于晉
使左鄆父告于秦鄭伯與孔將鉏石甲父侯宣多省視

官具于汜而後聽其私政禮也 二十五年秦伯師于

河上將納王狐偃言於晉侯曰求諸侯莫如勤王諸侯

信之且大義也繼文之業而信宣於諸侯今為可矣使

卜偃卜之曰吉遇黃帝戰于阪泉之兆公曰吾不堪也

對曰周禮未改今之王古之帝也公曰筮之筮之遇大

有


離乾

上之睽



兌下
離上

曰吉遇公用享于天子之

卦戰克而王饗吉孰大焉且是卦也天為澤以當日天

子降心以逆公不亦可乎大有去睽而復亦其所也

去言

睽卦而論大有亦有天子降心之象乾尊離卑降尊下卑亦有義也晉侯辭秦師而下右

師圍溫左師逆王四月王入于王城取大叔于溫殺之

于隰城戊午晉侯朝王王饗醴命之宥請隧弗許曰王

章也未有代德而有二王亦叔父之所惡也與之陽樊

溫原攢官才茅之田晉於是始啓南陽陽樊不服圍之倉

葛呼曰德以柔中國刑以威四夷宜吾不敢服也此誰

非王之親姻其俘之也乃出其民冬晉侯圍原命三日

之糧原不降命去之謀出曰原將降矣軍吏曰請待之

公曰信國之寶也民之所庇也得原失信何以庇之
所亡滋多退一舍而原降晉侯問原守於寺人勃鞞
對曰昔趙衰以壺飡從徑餒而弗食故使處原

六年

楚子圍許

楚子圍許蔡穆侯將許僖公見楚子于武城許男面縛
銜璧大夫衰經士輿襯楚子問諸逢伯對曰昔武王克
殷微子啓如是武王親釋其縛受其璧而祓

芳弗切之
徐音廢

焚其櫬禮而命之使復其所楚子從之

八年

晉敗狄于采桑

晉里克帥師梁由靡御虢射

食亦為右

以敗狄于采桑梁

由靡曰狄無恥從之必大克里克曰懼之而已無速衆
狄虢射曰期年狄必至示之弱矣夏狄伐晉復期月

魚氏世為左師

宋公疾大子茲父固請曰目夷長且仁君其立之公命

子魚子魚辭曰能以國讓仁孰大焉臣不及也且又不
順遂走而退 九年宋襄公即位以公子目夷為仁使
為左師以聽政於是宋治故魚氏世為左師

九年

晉惠懷之敗

晉卻芮使夷吾重賂秦以求入曰人實有國我何愛焉
入而能民土於何有從之齊隰朋帥師會秦師納晉惠
公秦伯謂卻芮曰公子誰恃對曰臣聞亡人無黨有黨

必有讎夷吾弱不好美能鬪不過長亦不改不識其他
公謂公孫枝曰夷吾其定乎對曰臣聞之唯則定國詩
曰不識不知順帝之則文王之謂也又曰不僭不賊鮮
不為則無好無惡不忌不克之謂也今其言多忌克難
哉公曰忌則多怨又焉能克是吾利也 十年夏周公
忌父王子黨會齊隰朋立晉侯晉侯殺里克以說將殺
里克公使謂之曰微子則不及此雖然子弑二君與一
大夫為子君者亦亦難乎對曰不有廢也君何以興欲

加之罪其無辭乎臣聞命矣伏劍而死於是平鄭聘于秦且謝緩賂故不及晉侯改葬共太子狐突適下國遇太子大子使登僕而告之曰夷吾無禮余得請於帝矣將以晉畀秦秦將祀余對曰神不歆非類民不祀非族君祀無乃殄乎且民何罪失刑乏祀君其圖之君曰諾吾將復請七日新城西偏將有巫者而見我焉許之遂不見及期而往告之曰帝許我罰有罪矣敝于韓平鄭之如秦也言於秦伯曰呂甥卻稱冀芮實為不從若重

問以召之臣出晉君君納重耳蔑不濟矣秦伯使冷至
報問且召三子卻芮曰幣重而言甘誘我也遂殺平鄭
祁舉及七輿大夫

侯伯七命
副車七乘

皆里克之黨也平豹奔秦

言於秦伯曰晉侯背大主而忌小怨民弗與也伐之必
出公曰失衆焉能殺違禍誰能出君 十一年天王使

召武公內使過賜晉侯命受玉情過歸告王曰晉侯其
無後乎王賜之命而情於受瑞先自棄也已其何繼之
有禮國之幹也敬禮之輿也不敬則禮不行禮不行則

上下昏何以長世 十三年晉荐饑使乞糴于秦秦伯
謂子桑與諸乎對曰重施而報君將何求重施而不報
其民必攜攜而討焉無衆必敗謂百里與諸乎對曰天
災流行國家代有救災恤鄰道也行道有福平鄭之子
豹在秦請伐晉秦伯曰其君是惡其民何罪秦於是乎
輸粟于晉自雍及絳相繼命之曰汎舟之役 十四年
秋八月沙鹿崩卜偃曰期年將有大咎幾亡國冬秦饑
使乞糴于晉晉人弗與慶鄭曰背施無親幸災不仁貪

愛不祥怒鄰不義四德皆失何以守國虢射曰皮之不存毛將安傅慶鄭曰棄信背鄰患孰恤之無信患作失援必斃是則然矣虢射曰無損於怨而厚於寇不如勿與慶鄭曰背施幸災民所棄也近猶讎之況怨敵乎弗聽退曰君其悔是哉十五年晉侯入也秦穆姬屬賈君焉且曰盡納羣公子晉侯烝於賈君又不納羣公子是以穆姬怨之晉侯許賂中大夫既而皆背之賂秦伯以河外列城五既而不與晉饑秦輸之粟秦饑晉閉

之糴故秦伯伐晉卜徒父筮之吉涉河侯車敗詰之對

曰乃大吉也三敗必獲晉君其卦遇蠱



巽下艮上

曰千

乘三去三去之餘獲其雄狐夫狐蠱必其君也蠱之貞

風也其悔山也

內卦為貞外卦為悔

歲云秋矣我落其實而取其

材所以克也實落材亡不敗何待三敗及韓晉侯謂慶

鄭曰寇深矣若之何對曰君實深之可若何公曰不孫

卜右慶鄭吉弗使步揚御戎家僕徒為右乘小駟鄭入

也慶鄭曰古者大事必乘其產生其水土而知其人心

安其教訓而服習其道唯所納之無不如志今乘異產
以從戎事及懼而變將與人易亂氣狡憤陰血周作張

中亮

脉僨

方問切
動也

興外彊中乾進退不可周旋不能君

必悔之弗聽九月晉侯逆秦師使韓簡視師復曰師少
於我鬪士倍我公曰何故對曰出因其資入用其寵飢
食其粟三施而無報是以來也今又擊之我怠秦奮倍
猶未也公曰一夫不可狃況國乎遂使請戰曰寡人不
佞能合其衆而不能離也君若不還無所逃命秦伯使

公孫枝對曰君之未入寡人懼之入而未定列猶吾憂也苟列定矣敢不承命韓簡退曰吾幸而得囚壬戌戰于韓原晉戎馬還渟而止公號慶鄭慶鄭曰復諫違卜固敗是求又何逃焉遂去之梁由靡御韓簡虢射為右輅五秦伯將止之鄭以救公誤之遂失秦伯秦獲晉侯嫁以歸晉大夫反首拔舍拔草舍止從之秦伯使辭焉曰二三子何其感也寡人之從君而西也亦晉之妖夢是踐豈敢以至晉大夫三拜稽首曰君履后土而戴皇天皇天

后土實聞君之言羣臣敢在下風穆姬聞晉侯將至以

大子瑩弘與女簡璧登臺而履薪焉

穆姬欲自罪故登臺而荐之以薪左

右上下者使以免服縗經逆且告曰上天降災使我兩

君匪以玉帛相見而以興戎若晉君朝以入則婢子夕

以死夕以入則朝以死唯君裁之乃舍諸靈臺大夫請

以入公曰獲晉侯以厚歸也既而喪歸焉用之大夫其

何有焉且晉人感憂以重我天地以要我不圖晉憂重

其怒也我食吾言背天地也重怒難任背天不祥必歸

晉君公子縶曰不如殺之無聚慝焉子桑曰歸之而質其大子必得大成晉未可滅而殺其君祇以成惡史佚有言曰無始禍無怙亂無重怒重怒難任陵人不祥乃

許晉平晉侯使卻乞告瑕呂飴甥

即呂甥也蓋姓瑕呂名飴甥

且召

之子金教之言曰

子金甥字

朝國人而以君命賞且告之曰

孤雖歸辱社稷矣其卜貳圉也晉於是乎作爰田

分公田之

稅應入公者爰之於所賞之衆

呂甥曰君亡之不恤而羣臣是憂惠之

至也將若君何衆曰何為而可對曰征繕以輔孺子諸

侯聞之喪君有君羣臣輯睦甲兵益多好我者勸惡我

者懼庶有益乎衆說晉於是乎作州兵

使州長各繕兵

初晉獻

公筮嫁伯姬於秦遇歸妹



兌下震上

之睽



兌下離上

史

蘇占之曰不吉其繇曰士刳羊亦無益也

血也

女承筐亦

無眚也西鄰責言不可償也歸妹之睽猶無相也震之

離亦離之震為雷為火為羸敗姬

離為火

火動熾而害其母女嫁反害其家

之車脫其輹火焚其旗不利行師敗于宗丘

震為車離為火上六

爻在震則無應故車說輹在離則失位故火焚旗車敗
火焚故不利行師火還害母故敗不出國近在宗邑

歸妹睽孤寇張之弧

處睽之極失位孤絕故遇寇雖有弓矢之警

姪其從姑

震為木離為火火從木生離為震妹於火為姑

六年其逋逃歸其國而棄其家

明年其死於高梁之虛及惠公在秦曰先君若從史蘇之占吾不及此夫韓簡侍曰龜象也筮數也物生而後有象象而後有滋滋而後有數先君之敗德及可數乎史蘇是占勿從何益詩曰下民之孽匪降自天傳語背憎職競由人十月晉陰飴甥陰采邑會秦伯盟于王城秦伯曰晉國和乎對曰不和小人恥失其君而悼喪其

親不憚征繕以立圍也曰必報讎寧事戎狄君子愛其
君而知其罪不憚征繕以待秦命曰必報德有死無二
以此不和秦伯曰國謂君何對曰小人感謂之不免君
子恕以為必歸小人曰我毒秦秦豈歸君君子曰我知
罪矣秦必歸君貳而執之服而舍之德莫厚焉刑莫威
焉服者懷德貳者畏刑此一役也秦可以霸納而不定
廢而不立以德為怨秦不其然秦伯曰是吾心也改館
晉侯饋七牢焉

牛羊豕各一為一牢

蛾析魚綺謂慶鄭曰盍行乎對

曰陷君於敗敗而不死又使失刑非人臣也臣而不臣
行將焉入十一月晉侯歸殺慶鄭而後入是歲晉又饑
秦伯又餽之粟曰吾怨其君而矜其民且吾聞唐叔之
封也箕子曰其後必大晉其庸可冀乎姑樹德焉以待
能者於是秦始征晉河東置官司馬十七年夏晉大
子圉為質於秦秦歸河東而妻之惠公之在梁也梁伯
妻之梁嬴孕過期卜招父與其子卜之其子曰將生一
男一女招曰然男為人臣女為人妾故名男曰圉女曰

妾及子圉西質妾為宦女焉 二十二年圉將逃歸謂

嬴氏曰與子歸乎對曰子晉大子而辱於秦子之欲歸
不亦宜乎寡君之使婢子侍執巾櫛以固子也從子而
歸棄君命也不敢從亦不敢言遂逃歸 二十三年秋
晉惠公卒懷公命無從亡人期期而不至無赦狐突之
子毛及偃從重耳在秦弗召冬懷公執狐突曰子來則
免對曰子之能仕父教之忠古之制也策名委質貳乃
辟也今臣之子名在重耳有年數矣若又召之教之貳

也父教子貳何以事君刑之不濫君之明也臣之願也
淫刑以逞誰則無罪臣聞命矣乃殺之卜偃稱疾不出
曰周書有之乃大明服已則不明而殺人以逞不亦難
乎民不見德而唯戮是聞其何後之有 二十四年春
公子重耳入于晉殺懷公于高梁

十六年

宋襄爭盟

春隕石于宋五隕星也六鷁退飛過宋都風也周内史

叔興聘于宋宋襄公問曰是何祥也吉凶焉在對曰今
茲魯多大喪明年齊有亂君將得諸侯而不終退而告
人曰君失問是陰陽之事非吉凶所生也吉凶由人吾
不敢逆君故也 十九年宋人執滕宣公夏盟于曹南
使邾文公用鄫子于次睢之社欲以屬東夷司馬子魚
曰古者六畜不相為用小事不用大牲而況敢用人乎
祭祀以為人也民神之主也用人其誰饗之齊桓公存
三亡國義士猶曰薄德今一會而虐二國之君又用諸

淫昏之鬼將以求霸不亦難乎得死為幸宋人圍曹討不服也子魚言於宋公曰文王聞宗德亂而伐之軍三旬不降退修教而復伐之因壘而降詩曰刑于寡妻至于兄弟以御于家邦今君德無乃猶有所闕而以伐人若之何盍姑內省德乎無闕而後動二十年宋襄公欲合諸侯臧文仲聞之曰以欲從人則可以人從欲鮮濟二十一年春宋人為鹿上之盟以求諸侯於楚楚人許之公子目夷曰小國爭盟禍也宋其亡乎幸而後

敗狄諸侯會宋公于孟楚執宋公以伐宋冬會于薄以
釋之子魚曰禍猶未也未足以懲君 二十二年三月
鄭伯如楚宋公伐鄭子魚曰所謂禍在此矣楚人伐宋
以救鄭宋公將戰大司馬固諫曰天之棄商久矣君將
興之弗可赦也已弗聽及楚人戰于泓宋人既成列楚
人未既濟司馬曰彼衆我寡及其未既濟也請擊之公
曰不可既濟而未成列又以告公曰未可既陳而後擊
之宋師敗績公傷股門官殲焉國人皆咎公公曰君子

不重傷不禽二毛古之為軍也不以阻隘也寡人雖亡國之餘不鼓不成列子魚曰君未知戰勅敵之人隘而不列天贊我也阻而鼓之不亦可乎猶有懼焉且今之勅者皆吾敵也雖及胡考獲則取之何有於二毛明恥教戰求殺敵也傷未及死如何勿重若愛重傷則如勿傷愛其二毛則如服焉三軍以利用也金鼓以聲氣也利而用之阻隘可也聲盛致志鼓儼可也鄭文夫人芊氏姜氏勞楚子于柯澤楚子使師緡示之俘馘君子曰

非禮也婦人送迎不出門見兄弟不踰閭戎事不邇女
器楚子入享于鄭九獻庭實旅百加籩豆六品享畢夜
出文芊送于軍取鄭二姬以歸叔詹曰楚王其不没乎
為禮卒於無別無別不可謂禮將何以沒諸侯是以知
其不遂霸也 二十三年夏宋襄公卒傷于泓故也

十八年

鄭鑄三鍾

鄭伯朝于楚楚子賜之金既而悔之與之盟曰無以鑄

金文四庫卷一
卷一
兵故以鑄三鍾

衛文滅邢

邢人狄人伐衛圍菟圃衛侯以國讓其父兄子弟及朝
衆曰苟能治之燬請從焉衆不可而後師于訾婁狄師
還 十九年秋衛人伐邢以報菟圃之役於是衛大旱
卜有事於山川不吉甯莊子曰昔周饑克殷而年豐今
邢方無道諸侯無伯天其或者欲使衛討邢乎從之師
興而雨 二十四年衛人將伐邢禮至曰不得其守國

不可得也我請昆弟仕焉乃往得仕 二十五年衛人
伐邢二禮從國子巡城掖以赴外殺之正月滅邢禮至
為銘曰余掖殺國子莫余敢止

梁亡

梁伯益其國而不能實也命曰新里秦取之 十九年
春遂城而居之初梁伯好土功亟城而弗處民罷而弗
堪則曰某寇將至乃溝公宮曰秦將襲我民懼而潰秦
遂取梁

二十年

王救滑以狄師伐鄭狄伐周王適鄭

滑人叛鄭而服於衛夏鄭公子士洩堵寇帥師入滑

二十四年師還又即衛鄭公子士洩堵俞彌伐滑王使
伯服游孫伯如鄭請滑鄭伯怨惠王之入而不與厲公
爵也又怨襄王之與衛滑也故不聽王命而執二子王
怒將以狄伐鄭富辰諫曰不可臣聞之大上以德撫民
其次親親以相及也昔周公弔二叔之不咸故封建親

戚以蕃屏周管蔡邶霍魯衛毛聃邴雍曹滕畢原酈卬
文之昭也邳晉應韓武之穆也凡蔣邢茅胙祭周公之
胤也召穆公思周德之不類故糾合宗族于成周而作
詩曰常棣之華鄂不韡韡凡今之人莫如兄弟其四章
曰兄弟閱于牆外禦其侮如是則兄弟雖有小忿不廢
懿親今天子不忍小忿以棄鄭親其若之何庸勲親親
暱近尊賢德之大者也即聾從昧與頑用器姦之大者
也棄德崇姦禍之大者也鄭有平惠之勲又有厲宣之

親棄嬖寵而用三良於諸姬爲近四德具矣耳不聽五聲之和為聾目不別五色之章為昧心不則德義之經為頑口不道忠信之言為嚚狄皆則之四姦具矣周之有懿德也猶曰莫如兄弟故封建之其懷柔天下也猶懼有外侮扞禦侮者莫如親親故以親屏周召穆公亦云今周德既衰於是乎又渝周召以從諸姦無乃不可乎民未忘禍王又興之其若文武何弗聽使頽叔桃子出狄師夏狄伐鄭取櫟王德狄人將以其女為后富辰

諫曰不可臣聞之曰報者倦矣施者未厭狄固貪惓王
又啓之女德無極婦怨無終狄必為患王又弗聽甘昭
公通於隗氏王替隗氏顏叔桃子曰我實使狄狄其怨
我遂奉大叔以狄師伐周大敗周師王出適鄭處于汜
隨以漢東諸侯叛楚

隨以漢東諸侯叛楚楚關穀於菟帥師伐隨取成而還
君子曰隨之見伐不量力也量力而動其過鮮矣善敗
由已而由人乎哉詩曰宜不夙夜謂行多露

二十一年

大旱饑而不害

夏大旱公欲焚巫尫臧文仲曰非旱備也修城郭貶食
省用務穡勸分此其務也巫尫何為天欲殺之則如勿
生若能為旱焚之滋甚公從之是歲也饑而不害

魯封須句

任宿須句顓臾風姓也實司大皞與有濟之祀以服事
諸夏邾人滅須句須句子來奔因成風也成風為之言

於公曰崇明祀保小寡周禮也蠻夷猾夏周禍也若封
須句是崇皞濟而修祀紓禍也 二十二年春伐邾取
須句反其君焉禮也 秋邾人以須句故士師公卑邾
不設備而禦之臧文仲曰國無小不可易也無備雖衆
不可恃也詩曰戰戰兢兢如臨深淵如履薄冰又曰敬
之敬之天惟顯思命不易哉先王之明德猶無不難也
無不懼也況我小國乎君其無謂邾小螽蟴有毒而況
國乎弗聽及邾師戰于升陘我師敗績邾人獲公冑縣

諸魚門

二十二年

秦晉遷陸渾之戎于伊川

初平王之東遷也辛有適伊川見被髮而祭於野者曰
不及百年此其戎乎其禮先亡矣秋秦晉遷陸渾之戎
于伊川

二十三年

楚子玉敗師城濮

楚成得臣帥師伐陳遂取焦夷城頓而還子文以為之
功使為令尹叔伯曰子若國何對曰吾以靖國也夫有
大功而無貴仕其人能靖者與有幾 二十七年楚子
將圍宋使子文治兵於睽終朝而畢不戮一人子玉復
治兵於蔿終日而畢鞭七人貫三人耳國老皆賀子文
子文飲之酒蔿賈尚幼後至不賀子文問之對曰不知
所賀子之傳政於子玉曰以靖國也靖諸內而敗諸外
所獲幾何子王之敗子之舉也舉以敗國將何賀焉子

玉剛而無禮不可以治民過三百乘其不能以入矣苟入而賀何後之有冬楚子及諸侯圍宋 二十八年春

晉侯侵曹伐衛楚子使子玉去宋曰無從晉師子玉使

伯勞請戰曰非敢必有功也願以間執讒慝之口

間執猶塞

也讒慝若為賈言不能以三百乘入間音諫

王怒少與之師唯西廣東宮與

若敖之六卒實從之戰于城濮楚師敗績初楚子玉自

為瓊弁玉纓未之服也先戰夢河神謂已曰畀余余賜

女孟諸之麋弗致也大心與子西使榮黃諫弗聽榮季

曰死而利國猶或為之況瓊玉乎是糞土也而可以濟師將何愛焉弗聽出告二子曰非神敗令尹令尹其不勤民實自敗也既敗王使謂之曰大夫若入其若申息之老何子西孫伯曰得臣將死二臣止之曰君其將以為戮及連穀而死為呂臣為令尹奉已而已不在民矣

秦伯納晉侯

晉公子重耳之及於難也晉人伐諸蒲城蒲城人欲戰重耳曰保君父之命而享其生祿於是乎得人有人而

校罪莫大焉吾其奔也遂奔狄從者狐偃趙衰顛頡魏武子司空季子狄人伐廆咎如獲其二女叔隗季隗納諸公子公子取季隗以叔隗妻趙衰生盾將適齊過衛衛文公不禮焉出於五鹿乞食於野人野人與之塊公子怒欲鞭之子犯曰天賜也稽首受而載之及齊齊桓公妻之有馬二十乘公子安之從者以為不可將行謀於桑下蠶妾在其上以告姜氏姜氏殺之而謂公子曰子有四方之志其聞之者吾殺之矣公子曰無之姜曰

行也懷與安實敗名姜與子犯謀醉而遣之醒以戈逐
子犯及曹曹共公聞其駢脅欲觀其裸浴薄而觀之僖
負羈之妻曰吾觀晉公子之從者皆足以相國若以相
夫子必反其國反其國必得志於諸侯得志於諸侯而
誅無禮曹其首也子盍蚤自貳焉乃饋盤飧寘璧焉公
子受飧反璧及宋宋襄公贈之以馬二十乘及鄭鄭文
公亦不禮焉叔詹諫曰臣聞天之所啓人弗及也晉公
子有三焉天其或者將建諸君其禮焉男女同姓其生

不蕃晉公子姬出也而至于今一也離外之患而天不靖晉國殆將啓之二也有三士足以上人而從之三也

國語狐偃趙衰賈佗三人者卿才也

晉鄭同儕其過子弟固將禮焉況天

之所啓乎弗聽及楚楚子饗之曰公子若反晉國則何以報不穀對曰子女玉帛則君有之羽毛齒革則君地生焉其波及晉國者君之餘也其何以報君曰雖然何以報我對曰若以君之靈得反晉國晉楚治兵遇於中原其辟君三舍若不獲命其左執鞭弭

莫右屬橐鞬九言

反上箭器
下弓衣

以與君周旋子玉請殺之楚子曰晉公子廣

而儉文而有禮其從者肅而寬忠而能力晉侯無親外

內惡之吾聞姬姓唐叔之後其後衰者也其將由晉公

子乎天將興之誰能廢之違天必有大咎乃送諸秦秦

伯納女五人懷嬴與焉奉匜

支可

沃盥既而揮之怒曰秦

晉匹也何以卑我公子懼降服而囚他日公享之子犯

曰吾不如衰之文也請使衰從公子賦河水公賦六月

趙衰曰重耳拜賜公子降拜稽首公降一級而辭焉衰

曰君稱所以佐天子者命重耳重耳敢不拜 二十四

年秦伯納之及河子犯以璧授公子曰臣負羈紲從君

巡於天下臣之罪甚多矣臣猶知之而況君乎請由此

亡公子曰所不與舅氏同心者有如白水投其璧于河

二月辛丑狐偃及秦晉之大夫盟于郇丙午入于曲沃

呂卻畏偃

呂甥卻芮

將焚公宮而弑晉侯寺人披請見公使

讓之且辭焉曰蒲城之役君命一宿女即至其後余從

狄君以田渭濱女為惠公來求殺余命女三宿女中

丁仲

宿至雖有君命何其速也夫祛猶在女其行乎對曰臣
謂君之入也其知之矣

知君子之道

若猶未也又將及難君

命無二古之制也除君之惡唯力是視蒲人狄人余何
有焉今君即位其無蒲狄乎齊桓公置射

亦食

鉤而使管

仲相君若易之何辱命焉行者甚衆豈唯刑臣公見之
以難告晉侯潛會秦伯于王城公宮火瑕甥卻芮不獲
公乃如河上秦伯誘而殺之晉侯逆夫人嬴氏以歸秦
伯送衛於晉三千人實紀綱之僕初晉侯之豎頭須守

藏

才者也

其出也竊藏以逃盡用以求納之及入求見

公辭焉以沐謂僕人曰沐則心覆心覆則圖反宜吾不

得見也居者為社稷之守行者為羈紲之僕其亦可也

何必罪居者國君而讎匹夫懼者甚衆矣公遽見之狄

人歸季隗于晉而請其二子

二子伯
僚叔劉

文公妻趙衰生原

同屏括樓嬰趙姬請逆盾與其母子餘辭姬曰得寵而

忘舊何以使人必逆之來以盾為才以為適子而使其

三子下之以叔隗為內子而已下之晉侯賞從亡者介

之推不言祿祿亦弗及推曰獻公之子九人唯君在矣
惠懷無親內外棄之天未絕晉必將有主主晉祀者非
君而誰天實置之而二三子以為已力不亦誣乎竊人
之財猶謂之盜況貪天之功以為已力乎下義其罪上
賞其姦上下相蒙難與處矣其母曰盍亦求之以死誰
懟對曰尤而效之罪又甚焉且出怨言不食其食其母
曰亦使知之若何對曰言身之文也身將隱焉用文之
是求顯也其母曰能如是乎與女偕隱遂隱而死晉侯

求之不獲以繇上為之田曰以志吾過且旌善人

二十四年

鄭殺子臧

鄭子華之弟子臧奔宋好聚鵲

尹橘切
翠鳥也

冠鄭伯聞而惡

之使盜殺之于陳宋之間君子曰服之不衷身之災也
詩曰彼知之子不稱其服子臧之服不稱也夫詩曰自
詒伊戚其子臧之謂矣夏書曰地平天成稱也

鄭享宋成公有加

宋成公如楚還入于鄭鄭伯將享之間禮於皇武子對曰宋先代之後也於周為客天子有事膳焉有喪拜焉豐厚可也鄭伯從之享宋公有加禮也

二十六年

晉文城濮之戰

夏齊孝公伐我北鄙公使展喜犒師使受命於展禽齊侯未入竟展喜從之曰寡君聞君親舉玉趾將辱於敝邑使下臣犒執事齊侯曰魯人恐乎對曰小人恐矣君

子則否齊侯曰室如縣罄野無青草何恃而不恐對曰
恃先王之命昔周公大公安肱周室夾輔成王成王勞
之而賜之盟曰世世子孫無相害也載在盟府大師職
之桓公是以糾合諸侯而謀其不協彌縫其闕而匡救
其災昭舊職也及君即位諸侯之望曰其率桓之功我
敝邑用不敢保聚曰豈其嗣世九年而棄命廢職其若
先君何君必不然恃此以不恐齊侯乃還東門裏仲臧
文仲如楚乞師臧孫見子玉而道之伐齊宋以其不臣

也

以不臣事周
可責以此罪

冬公以楚師伐齊取穀寘桓公子雍於

穀易牙奉之以為魯援楚申公叔侯戍之宋以其善於

晉侯也叛楚即晉

二十四年
宋及楚平

二十七年楚子及諸侯

圍宋宋公孫固如晉告急先軫曰報施救患取威定霸

於是乎在矣狐偃曰楚始得曹而新昏於衛若伐曹衛

楚必救之則齊宋免矣於是乎蒐于被廬作三軍謀元

帥趙衰曰卻穀可臣亟聞其言矣說禮樂而敦詩書詩

書義之府也禮樂德之則也德義利之本也夏書曰賦

納以言明試以功車服以庸君其試之乃使卻縠將中
軍卻縠佐之使狐偃將上軍讓於狐毛而佐之命趙衰
為卿讓於欒枝先軫使欒枝將下軍先軫佐之荀林父
御戎魏犢為右晉侯始入而教其民二年欲用之子犯
曰民未知義未安其居於是乎出定襄王入務利民
懷生矣將用之子犯曰民未知信未宣其用於是乎伐
原以示之信民易資者不求豐焉明徵其辭公曰可矣
乎子犯曰民未知禮未生其共於是乎大蒐以示之禮

作執秩以正其官民聽不惑而後用之出穀戍釋宋圍
一戰而霸文之教也 二十八年二月晉卻縠卒原軫
將中軍胥臣佐下軍上德也晉侯伐衛衛侯出居于襄
牛三月入曹令無入僖負羈之宮而免其族報施也魏
犇顛頡怒曰勞之不圖報於何有燕僖負羈氏魏犇傷
於胷公欲殺之而愛其材使問且視之病將殺之魏犇
束習見使者曰以君之靈不有寧也距躍三百超越也曲
踊三百跳踊也乃舍之殺顛頡以徇于師立舟之僑以為

戎右宋人使門尹般如晉師告急公曰宋人告急舍之則絕告楚不許我欲戰矣齊秦未可若之何先軫曰使宋舍我而賂齊秦藉之告楚我執曹君而分曹衛之田以賜宋人楚愛曹衛必不許也喜賂怒頑能無戰乎公說執曹伯分曹衛之田以畀宋人楚子入居于申使申叔去穀使子玉去宋曰無從晉師晉侯在外十九年矣而果得晉國險阻艱難備嘗之矣民之情僞盡知之矣天假之年而除其害天之所置其可廢乎軍志曰允當

則歸又曰知難而退又曰有德不可敵此三志者晉之
謂矣子玉使伯棼請戰王怒少與之師子玉使宛春告
於晉師曰請復衛侯而封曹臣亦釋宋之圍子犯曰子
玉無禮哉君取一臣取二不可失矣先軫曰子與之定
人之謂禮楚一言而定三國我一言而亡之我則無禮
何以戰乎不許楚言是棄宋也救而棄之謂諸侯何楚
有三施我有三怨怨讎已多將何以戰不如私許復曹
衛以攜之執宛春以怒楚既戰而後圖之公說乃私許

復曹衛曹衛告絕于楚子玉怒從晉師晉師退軍吏曰
以君辟臣辱也且楚師老矣何故退子犯曰師直為壯
曲為老宣在久乎微楚之惠不及此退三舍辟之所以
報也背惠食言以亢其讎我曲楚直其衆素飽不可謂
老我退而楚還我將何求若其不還君退臣犯曲在彼
矣退三舍楚衆欲止子玉不可夏晉侯宋公齊國歸父
崔天秦小子憇次于城濮楚師背鄢

戶圭反丘陵險阻名

而舍晉

侯患之聽輿人之誦曰原田每每

亡回

舍其舊而新是謀

俞晉軍美盛德若原田之公疑焉子犯曰戰也戰而捷草可以立新功不足念舊怨

必得諸侯若其不捷表裏山河必無害也公曰若楚惠

何藥貞子曰漢陽諸姬楚實盡之思小惠而忘大恥不

如戰也晉侯夢與楚子搏楚子伏已而監其腦是以懼

子犯曰吉我得天楚伏其罪吾且柔之矣

監噫也腦所以柔物

子

王使鬬勃請戰曰請與君之士戲君馮軾而觀之得臣

與寓目焉晉侯使欒枝對曰楚君之惠未之敢忘是以

在此為大夫退其敢當君乎既不獲命矣敢煩大夫謂

二三子戒爾車乘敬爾君事詰朝將見晉車七百乘韞

許韞以鞅杖韞音半在背曰韞在胷曰鞅在腹曰鞅在後曰鞅晉侯登有莘之

虛以觀師曰少長有禮其可用也遂伐其木以益其兵

伐木以益戰具胥臣以下軍之佐當陳蔡子玉以若敖

之六卒將中軍子西將左子上將右胥臣蒙馬以虎皮

先犯陳蔡陳蔡奔楚右師潰狐毛設二旆而退之使若大將

却小藥枝使輿曳柴而偽遁楚師馳之原軫卻縠以中軍

公族橫擊之狐毛狐偃以上軍夾攻子西楚左師潰子

王收其卒而止故不敗晉師三日館穀作王宮于踐土

五月丁未獻楚俘于王駟介

四馬被甲

百乘徒兵千鄭伯傅

王

傳相也

用平禮也已酉王享醴命晉侯宥命尹氏及王

子虎內史叔興父策命晉侯為侯伯賜之大輅之服戎

輅之服

大輅金輅

彤弓一彤矢百旅弓矢千秬鬯一卣虎賁

三百人曰王謂叔父敬服王命以緩四國糾遯王慝晉

侯三辭從命曰重耳敢再拜稽首奉揚天子之不顯休

命受策以出出入三覲

癸亥王子虎盟諸侯于王庭

要言曰皆獎王室無相害也有渝此盟明神殛之俾隊其師無克祚國及而玄孫無有老幼君子謂是盟也信謂晉於是役也能以德攻 楚子玉既敗及連穀而死晉侯聞之而後喜可知也曰莫余毒也已 城濮之戰

晉中軍風于澤亡大旆之左旃祁瞞奸命司馬殺之以徇于諸侯師還濟河舟之僑先歸士會攝右秋七月振旅愷以入于晉獻俘授馘飲至大賞徵會討貳殺舟之僑以徇于國民於是大服君子謂文公其能刑矣三罪

而民服詩云惠此中國以綏四方不失賞刑之謂也

夔子不祀祝融鬻熊

夔子不祀祝融與鬻熊

祝融之十世孫

楚人讓之對曰我先

王熊摯有疾鬼神弗赦而自竄于夔吾是以失楚又何祀焉秋楚成得臣鬬宜申帥師滅夔

二十八年

王釋衛侯

晉侯伐衛衛侯請盟晉人弗許衛侯欲與楚國人不欲

故出其君以說于晉衛侯出居襄牛衛侯聞楚師敗懼
出奔楚遂適陳使元咺奉叔武以受盟或訴元咺於衛
侯曰立叔武矣其子角從公公使殺之咺不廢命奉夷
叔以入守六月晉人復衛侯甯武子與衛人盟于宛濮
曰天禍衛國君臣不協以及此憂也今天誘其衷使皆
降心以相從也不有居者誰守社稷不有行者誰扞牧
圉不協之故用昭乞盟于爾大神以誘天衷自今日以
往既盟之後行者無保其力居者無懼其罪有渝此盟

以相及也明神先君是糾是殛國人聞此盟也而後不
貳衛侯先期入叔武將沐聞君至喜捉髮走出前驅射
而殺之公知其無罪也枕之股而哭之元咺出奔晉冬
衛侯與元咺訟甯武子為輔鍼莊子為坐士榮為大士
衛侯不勝殺士榮刖鍼莊子謂甯俞忠而免之執衛侯
歸之于京師寘諸深室甯子職納橐籥焉元咺歸于衛
立公子瑕三十年晉侯使醫衍酖衛侯甯俞貨醫使
薄其酖不死公為之請納玉於王與晉侯皆十穀王許

之釋衛侯衛侯使賂周欽冶厘

僅

曰苟納我吾使爾為

卿周冶殺元咺及子適子儀

子儀瑕母弟

公入祀先君周冶

既服將命周欽先入及門遇疾而死冶厘辭卿

晉復曹伯

晉侯圍曹門焉多死曹人尸諸城上晉侯患之聽輿人

之謀曰稱舍於墓師遷焉曹人兇懼為其所得者棺而

出之因其兇也而攻之三月丙午入曹數之以其不用

僖負羈而乘軒者三百人也且曰獻狀

無德而居位故責其功狀

公

執曹伯冬晉侯有疾曹伯之豎侯孺貨筮史使曰以曹
為解齊桓公為會而封異姓今君為會而滅同姓曹叔
振鐸文之昭也先君唐叔武之穆也且合諸侯而滅兄
弟非禮也與衛偕命而不與偕復非信也同罪異罰非
刑也禮以行義信以守禮刑以正邪舍此三者君將若
之何公說復曹伯 三十一年春取濟西田分曹地也
使臧文仲往宿於重館重館人告曰晉新得諸侯必親
其共不速行將無及也從之分曹地自洮以南東傳

于濟盡曹地也

晉敗秦師于穀

鄉役之三月鄭伯如楚致其師為楚師既敗而懼使子
人九行成于晉五月晉侯及鄭伯盟于衡雍 二十九
年夏公會王子虎晉狐偃宋公孫固齊國歸父陳轅濤
塗秦小子憖盟于翟泉謀伐鄭也 三十年九月甲午
晉侯秦伯圍鄭以其無禮於晉晉軍函陵秦軍汜南佚
之狐言於鄭伯曰國危矣若使燭之武見秦君師必退

公從之辭曰臣之壯也猶不如人今老矣無能為也已
公曰吾不能蚤用子今急而求子是寡人之過也然鄭
亡子亦有不利焉許之夜縋而出見秦伯曰越國以鄙
遠君知其難也焉用亡鄭以陪鄰鄰之厚君之薄也若
舍鄭以為東道主行李之往來共其乏困君亦無所害
且君嘗為晉君賜矣許君焦瑕朝濟而夕設版焉君之
所知也夫晉何厭之有既東封鄭又欲肆其西封若不
闕秦將焉取之闕秦以利晉唯君圖之秦伯說與鄭人

盟使杞子逢孫楊孫戍之乃還子犯請擊之公曰不可
微夫人之力不及此因人之力而敝之不仁失其所與
不知以亂易整不武吾其還也亦去之初鄭公子蘭出
奔晉鄭石甲父侯宣多逆以為太子以求成于晉晉人
許之 三十二年冬晉文公卒將殯于曲沃出絳柩有
聲如牛卜偃使大夫拜曰君命大事將有西師過軼我
擊之必大捷焉杞子自鄭使告于秦曰鄭人使我掌其
北門之管若潛師以來國可得也穆公訪諸蹇叔蹇叔

曰勞師以襲遠非所聞也師勞力竭遠主備之無乃不可乎師之所為鄭必知之勤而無所必有悖心且行千里其誰不知公辭焉召孟明西乞白乙使出師於東門之外蹇叔哭之曰孟子吾見師之出而不見其入也公使謂之曰爾何知中壽爾墓之木拱矣蹇叔之子與師哭而送之曰晉人禦師必於殽殽有二陵焉其南陵夏后臯之墓也其北陵文王之所辟風雨也必死是間余收爾骨焉秦師遂東 三十三年春秦師過周北門左

右免胄而下超乘者三百乘王孫滿尚幼觀之言於王
曰秦師輕而無禮必敗輕則寡謀無禮則脫入險而脫
又不能謀能無敗乎及滑鄭商人弦高將市於周遇之
以乘韋先恐薦牛十二犒師且使遽告于鄭鄭穆公使視

客館則束載厲兵秣馬矣使皇武子辭焉曰吾子淹久
於敝邑唯是脯資餼牽竭矣為君子之將行也鄭之有
原圃猶秦之有具囿也吾子取其麋鹿以閒敝邑若何
杞子奔齊逢孫楊孫奔宋孟明曰鄭有備矣不可冀也

攻之不克圍之不繼吾其還也滅滑而還晉原軫曰秦
違蹇叔而以貪勤民天奉我也奉不可失敵不可縱縱
敵患生違天不祥必伐秦師藥枝曰未報秦施而伐其
師其為死君乎先軫曰秦不哀吾喪而伐吾同姓秦則
無禮何施之為吾聞之一日縱敵數世之患也謀及子
孫可謂死君乎遂發命遽興姜戎子墨衰絰梁弘御戎
萊駒為右敗秦師于殽獲百里孟明視西乞術白乙丙
以歸遂墨以葬文公晉於是始墨文嬴請三帥公許之

先軫朝問秦囚公曰夫人請之吾舍之矣先軫怒曰武夫力而拘諸原婦人暫而免諸國墮軍實而長寇讎亡無日矣不顧而唾公使陽處父追之及諸河則在舟中矣釋左驂以公命贈孟明孟明稽首曰君之惠不以累臣釁鼓使歸就戮于秦寡君之以為戮死且不朽若從君惠而免之三年將拜君賜秦伯素服郊次鄉師而哭曰孤違蹇叔以辱二三子孤之罪也不替孟明孤之過也大夫何罪且吾不以一眚掩大德 文二年秦孟明

視帥師伐晉以報殺之役二月晉侯樂之先且居將中
軍趙衰佐之王官無地御戎狐鞫居為右甲子及秦師
戰于彭衙秦師敗績晉人謂秦拜賜之師戰於殺也晉
梁弘御戎萊駒為右戰之明日晉襄公縛秦囚使萊駒
以戈斬之囚呼萊駒失戈狼曠尺取戈以斬囚禽之以
從公乘遂以為右箕之役先軫黜之而立續簡伯狼曠
怒其友曰吾與女為難曠曰周志有之勇則害上不登
於明堂死而不義非勇也

明堂祖廟也所以策功序
德故不義之士不得升共

用之為勇

恭共音

吾以勇求右無勇而黜亦其所也謂上

不我知黜而宜乃知我矣子姑待之及彭衙既陳以其
屬馳秦師死焉晉師從之大敗秦師君子謂狼曠於是
乎君子詩曰君子如怒亂庶遄沮又曰王赫斯怒爰整
其旅怒不作亂而以從師可謂君子矣秦伯猶用孟明
孟明增修國政重施於民趙成子言於諸大夫曰秦師
又至將必辟之懼而憎德不可當也詩曰毋念爾祖聿
修厥德孟明念之矣念德不怠其可敵乎 三年夏秦

伯伐晉濟河焚舟取王官及郊晉人不出遂自茅津濟
封穀尸而還遂霸西戎用孟明也君子是以知秦穆公
之為君也舉人之周也與人之壹也孟明之臣也其不
解也能懼思也子桑之忠也其知人也能舉善也詩曰
予以采芣于沼于汙予以用之公侯之事秦穆有焉夙
夜匪懈以事一人孟明有焉詒厥孫謀以燕翼子子桑
有焉

晉置軍行

晉侯作三行以禦狄荀林父將中行屠擊將右行先蔑

將左行

置三軍矣復置三行蓋辟天子大軍之名三行無佐疑大夫帥

三十一年秋

晉蒐于清原作五軍以禦狄趙衰為卿

罷三軍更為上下新軍

文六年春晉蒐于夷舍三軍

復三軍之制

二十九年

介葛盧來朝

介葛盧來朝公在會饋之芻米禮也冬介葛盧來以未

見公故復來朝禮之加燕好介葛盧聞牛鳴曰是生三

犧皆用之矣其音云問之而信

三十年

王使周公閱來聘

王使周公閱來聘饗有昌歠

在感

白黑

白粢稻黑粢黍

形鹽辭曰

國君文足昭也武可畏也則有備物之饗以象其德薦五味羞嘉穀鹽虎形以獻其功吾何以堪之

三十一年

狄圍衛衛遷于帝丘

冬狄圍衛衛遷于帝丘卜曰三百年衛成公夢康叔曰
相奪予享公命祀相甯武子不可曰鬼神非其族類不
歆其祀祀卽何事相之不享於此久矣非衛之罪也不
可以間成王周公之命祀請改祀命

三十三年

齊國莊子來聘

齊國莊子來聘自郊勞至于贈賄禮成而加之以敏臧
文仲言於公曰國子為政齊猶有禮君其朝焉臣聞之

服於有禮社稷之衛也

胥臣舉卻缺

狄伐晉晉侯敗狄于箕卻缺獲白狄子初臼季使過冀見冀缺耨其妻饁之敬相待如賓與之歸言諸文公曰敬德之聚也能敬必有德德以治民君請用之臣聞之出門如賓承事如祭仁之則也公曰其父有罪可乎對曰舜之罪也殛鯀其舉也興禹管敬仲桓之賊也實相以濟康誥曰父不慈子不祗兄不友弟不恭不相及也

詩曰采芣采菲無以下體君取節焉可也

取其善節

文公以

為下軍大夫反自箕襄公以三命命先且居將中軍

先軫

之子其父死敵故進之

以再命命先茅之縣賞胥臣曰舉卻缺子

之功也以一命命卻缺為卿復與之巢亦未有軍行

楚殺令尹子上

楚令尹子上侵陳蔡陳蔡成晉陽處父侵蔡楚子上救

之與晉師夾泚

雉

而軍陽子患之使謂子上曰吾聞之

文不犯順武不違敵子若欲戰則吾退舍子濟而陳遲

速唯命不然紓我老師費財亦無益也乃駕以待子上
欲涉大孫伯曰不可晉人無信半涉而薄我悔敗何及
不如紓之乃退舍陽子宣言曰楚師遁矣遂歸楚師亦
歸大子商臣譖子上曰受晉賂而辟之楚之恥也罪莫
大焉王殺子上

文公

元年

穆伯從已氏於莒

葬僖公王使叔服來會葬公孫敖聞其能相人也見其

二子焉叔服曰穀也食子

音難多

也收子穀也豐下必

有後於魯國

七年穆伯娶于莒曰戴已生文伯穀其

娣聲已生惠叔

難

戴已卒又聘于莒莒人以聲已辭則

為襄仲聘焉冬莒人來請盟穆伯如莒涖盟且為仲逆

見之美自為娶之仲請攻之公將許之叔仲惠伯諫曰

臣聞之兵作於內為亂於外為寇寇猶及人亂自及也

今臣作亂而君不禁以啓寇讎若之何公止之惠伯成

之使仲舍之公孫敖反之復為兄弟如初從之 八年
襄王崩穆伯如周弔喪不至以弊奔莒從已氏焉 十
四年穆伯之從已氏也魯人立文伯穆伯生二子於莒
而求復文伯以為請襄仲使無朝聽命復而不出三年
復適莒文伯疾而請曰穀之子弱請立難也許之文伯
卒于齊告喪惠叔請葬弗許 請以卿禮葬 十五年齊人或
為孟氏謀曰魯爾親也飾棺寘諸堂阜魯必取之從之
十人以告惠叔猶毀以為請立於朝以待命許之取而

殯之葬視共仲

以罪降

襄仲欲勿哭惠伯曰

叔彭生

喪親之

終也雖不能始善終可也史佚有言曰兄弟致美救乏

賀善弔災祭敬喪哀情雖不同母絕其愛親之道也子

無失道何怨於人襄仲說帥兄弟以哭之他年其二子

來孟獻子愛之聞於國

獻子穀子仲孫蔑

或譖之曰將殺子獻

子以告季文子二子曰夫子以愛我聞我以殺子聞不

亦遠於禮乎遠禮不如死一人門于句

鉤颺猛

一人門

于戾丘皆死

有寇攻門禦之而死

閏三月非禮

閏三月非禮也

於歷法當在僖末年失在今置

先王之正時也履端於

始舉正於中歸餘於終履端於始序則不愆舉正於中民則不惑歸餘於終事則不悖

晉及衛成

晉文公之季年諸侯朝晉衛成公不朝使孔達侵鄭晉襄公既祥使告于諸侯而伐衛先且居曰效尤禍也請君朝王臣從師晉侯朝王于溫先且居胥臣伐衛圍戚

取之衛人使告于陳陳共公曰更伐之我辭之

惡其不競故報

伐衛孔達帥師伐晉君子以為古古者越國而謀二

年穆伯會諸侯及晉士穀盟于垂隴討衛也陳侯為衛

請成于晉執孔達以說四年春晉人歸孔達于衛以

衛之良也故免之七年晉卻缺言於趙宣子曰日衛

不睦故取其地今已睦矣可以歸之叛而不討何以示

威服而不柔何以示懷非威非懷何以示德無德何以

主盟子為正卿以主諸侯而不務德將若之何夏書曰

戒之用休董之用威勸之以九歌俾勿壞九功之德皆可歌也謂之九歌六府三事謂之九功水火金木土穀謂之六府正德利用厚生謂之三事義而行之謂之德禮無禮不樂所由叛也若吾子之德莫可歌也其誰來之盍使睦者歌吾子乎宣子說之八年晉侯使解揚歸匡戚之田于衛且復致公壻池之封

公壻亦取
衛地封之自申

至于虎牢之竟

楚穆王立

楚子將以商臣為大子訪諸令尹子上子曰君之齒
未也而又多愛黜乃亂也楚國之舉常在少者且是人
也蚤目而豺聲忍人也不可立也弗聽既又欲立王子
職而黜商臣商臣聞之告其師潘崇曰若之何而察之
潘崇曰享江芊而勿敬也從之江芊怒曰呼

好賀反
發聲

役

夫宜君王之欲殺女而立職也告潘崇曰信矣冬以宮

甲圍成王王請食熊蹯

煩

而死

熊煩難熟欲
久將有外救

弗聽王縊

謚之曰靈不瞑曰成乃瞑穆王立以其為大子之室與

潘崇使為大師且掌環列之尹

穆伯如齊始聘

穆伯如齊始聘焉禮也凡君即位卿出並聘踐修舊好
要結外援好事鄰國以衛社稷忠信卑讓之道也忠德
之正也信德之固也卑讓德之基也

二年

躋僖公

大事于大廟躋僖公逆祀也於是夏父弗忌為宗伯尊

僖公且明見曰吾見新鬼大故鬼小先大後小順也躋
聖賢明也明順禮也君子以為失禮禮無不順祀國之
大事也而逆之可謂禮乎子雖齊聖不先薦父食久矣

故禹不先

上同

鯀湯不先契文武不先不窋宋祖帝乙鄭

祖厲王猶上祖也是以魯頌曰春秋匪解享祀不忒皇
皇后帝皇祖后稷君子曰禮謂其后稷親而先帝也詩
曰罔我諸姑遂及伯姊君子曰禮謂其姊親而先姑也
仲尼曰臧文仲其不仁者三不知者三下展禽廢六關

妾織蒲三不仁也作虛器縱逆祀祀爰居三不知也

襄仲立宣公

襄仲如齊納幣禮也凡君即位好舅甥修昏姻娶元妃以奉粢盛孝也孝禮之始也四年逆婦姜于齊卿不行非禮也君子是以知出姜之不允於魯也曰貴聘而賤逆之君而卑之立而廢之棄信而壞其主在國必亂在家必亡不允宜哉詩曰畏天之威于時保之敬主之謂也十八年冬襄仲殺惡及視而立宣公夫人姜氏

大歸于齊將行哭而過市曰天乎仲為不道殺嫡立庶
市人皆哭魯人謂之哀姜

晉人改陽處父之盟

晉人以公不朝來討公如晉晉人使陽處父盟公以恥
之三年晉人懼其無禮於公也請改盟公如晉及晉

侯盟晉侯饗公賦菁菁者莪

取既見君子
樂且有儀

莊叔以公降

拜曰小國受命於大國敢不慎儀君貺之以大禮何樂
如之抑小國之樂大國之惠也晉侯降辭登成拜公賦

嘉樂

四年

楚滅江秦伯降服

楚人滅江秦伯為之降服出次不舉過數

鄰國之禮有數今秦伯過

之大夫諫公曰同盟滅雖不能救敢不矜乎吾自懼也
君子曰詩云惟彼二國其政不獲惟此四國爰究爰度
其秦穆之謂矣

衛甯武子來聘

衛甯武子來聘公與之宴為賦湛露及彤弓不辭又不
答賦使行人私焉對曰臣以為肄業及之也昔諸侯朝
正於王王燕樂之於是乎賦湛露則天子當陽諸侯用
命也諸侯敵王所愾而獻其功王於是乎賜之彤弓一
彤矢百茲弓矢千以覺報宴覺明也今陪臣來繼舊好君
辱貺之其敢干大禮以自取戾

五年

楚滅六蓼臯陶不祀

六人叛楚即東夷楚成大心仲歸子帥師滅六冬楚公
子變滅蓼臧文仲聞六與蓼滅曰臯陶庭堅不祀忽諸
德之不建民之無援哀哉

賈季殺陽處父

晉陽處父聘于衛反過甯甯嬴從之及溫而還其妻問
之嬴曰嬴旅逆大夫以剛商書曰沉潜似廉剛克高明柔克夫

子壹之其不沒乎天為剛德猶不干時況在人乎且華
而不實怨之所聚也犯而聚怨不可以定身余懼不獲

其利而離其難是以去之 六年晉蒐于夷使狐射姑

將中軍趙盾佐之陽處父至改蒐于董易中軍陽子成

季之屬也故黨於趙氏且謂趙盾能曰使能國之利也

是以上之宣子於是乎始為國政制事典正法罪辟獄

刑

辟理也

董逋逃由質要

券契

治舊滂

理去滂穢

本秩禮

貴賤不失其本

續常職

修度官

出滯淹既成以授大傅陽子與大師賈佗

使行諸晉國以為常法秋賈季怨陽子之易其班也而

知其無援於晉也使續鞠居殺陽處父晉殺續簡伯賈

季奔狄宣子使史駢送其帑夷之蒐賈季戮史駢史駢
之人欲盡殺賈氏以報焉史駢曰不可吾聞前志有之
曰敵惠敵怨不在後嗣忠之道也夫子禮於賈季我以
其寵報私怨無乃不可乎介人之寵非勇也損怨益仇
非知也以私害公非忠也釋此三者何以事夫子盡具
其帑與其器用財賄親帥扞之送致諸竟

六年

秦伯任好卒以三良為殉

秦伯任好卒以子車氏之三子奄息仲行鍼

其康

虎為殉

皆秦之良也君子曰秦穆之不為盟主也宜哉死而棄

民先王違世猶詒之法而況奪之善人乎詩曰人之云

亡邦國殄瘁無善人之謂若之何奪之古之王者知命

之不長是以並建聖哲樹之風聲分之采物著之話言

為之律度陳之藝極引之表儀予之法制告之訓典教

之防利

防惡與利

委之常秩

官司常職

道之以禮則使毋失其土

宜衆隸賴之而後即命聖王同之今縱無法以遺後嗣

而又收其良以死難以在上矣君子是以知秦之不復東征也

晉立靈公復士會

季文子將聘于晉使求遭喪之禮以行其人曰將焉用之文子曰備豫不虞古之善教也求而無之實難過求

何害

所謂三思

八月晉襄公卒靈公少晉人以難故欲立長

君趙孟曰立公子雍好善而長先君愛之且近於秦秦舊好也置善則固事長則順立愛則孝結舊則安為難

故故欲立長君有此四德者難必抒矣

直呂切除也

賈季曰

不如立公子樂辰羸嬖於二君立其子民必安之趙孟曰為二嬖淫也為先君子不能求大而出在小國辟也

母淫子辟無威陳小而遠無援將何安焉杜祁以君故

讓偏彼姑而上之

偏姑生襄公故避使在上

以狄故讓季隗而已次

之先君是以愛其子而仕諸秦為亞卿焉秦大而近足以為援母義子愛足以威民立之不亦可乎使先蔑士會如秦逆公子雍賈季亦使召公子樂于陳趙孟使殺

諸耶

婢支反

七年秦康公送公子雍于晉曰文公之入

也無衛故有呂卻之難乃多與之徒衛穆嬴日抱大子以啼于朝曰先君何罪其嗣亦何罪舍適嗣不立而外求君將焉寘此出朝則抱以適趙氏頓首於宣子曰先君奉此子也而屬諸子曰此子也才吾受子之賜不才吾唯子之怨今君雖終言猶在耳而棄之若何宣子與諸大夫皆患穆嬴且畏偁乃背先蔑而立靈公以禦秦師及董謹陰宣子曰我若受秦秦則實也不受寇也既

不受矣而復

又扶

緩師秦將生心先

悉薦

人有奪人之心軍

之善謀也逐寇如追逃軍之善政也訓卒利兵秣馬蓐

食潛師夜起敗秦師于令狐先蔑奔秦士會從之先蔑

之使也荀林父止之曰夫人大子猶在而外求君此必

不行子以疾辭若何不然將及攝卿以往可也同官為

寮吾嘗同寮敢不盡心乎弗聽為賦板之三章

取芻蕘之言不

可忽又弗聽及亡荀伯盡送其帑及其器用財賄於秦曰

為同寮故也十二年秦伯使西乞術來聘且言將伐

晉襄仲辭玉曰君不忘先君之好鎮撫其社稷重之以
大器寡君敢辭玉對曰不腆敝器不足辭也主人三辭
賓荅曰寡君願徼福于周公魯公以事君不腆先君之
敝器使下臣致諸執事以為瑞節要結好命所以藉寡
君之命結二國之好是以敢致之襄仲曰不有君子其
能國乎國無陋矣厚賄之秦為令狐之役故秦伯伐晉
取羈馬晉人禦之趙盾將中軍荀林父佐之卻缺將上
軍史駢佐之欒盾將下軍胥甲佐之范無恤御戎以從

秦師于河曲史駢曰秦不能久請深壘固軍以待之從之秦人欲戰秦伯謂士會曰若何而戰對曰趙氏新出其屬曰史駢必實為此謀將以老我師也趙有側室

支子

曰穿晉君之壻也有寵而弱不在軍事好勇而狂且惡史駢之佐上軍也若使輕者肆焉其可秦伯以璧祈戰于河十二月秦師掩晉上軍趙穿追之不及反怒曰裹糧坐甲固敵是求敵至不擊將何俟焉軍吏曰將有待也穿曰我不知謀乃以其屬出宣子曰秦獲穿也獲一

卿矣秦以勝歸我何以報乃皆出戰交綏

古名退軍為綏

秦行

人夜戒晉師曰兩軍之士皆未慙

慙缺也

也明日請相見

也史駢曰使者目動而言肆懼我也將遁矣薄諸河必

敗之胥甲趙穿當軍門呼曰死傷未收而棄之不惠也

不待期而薄人於險無勇也乃止秦師夜遁復侵晉入

瑕十三年晉人患秦之用士會也夏六卿相見於諸

浮趙宣子曰隨會在秦賈季在狄難日至矣若之何中

行桓子曰請復賈季能外事且由舊勲卻成子曰賈季

亂且罪大不如隨會能賤而有耻柔而不犯其知足使也且無罪乃使魏壽餘偽以魏叛者以誘士會執其帑於晉使夜逸請自歸于秦秦伯許之履士會之足於朝秦伯師于河西魏人在東壽餘曰請東人之能與夫二三有司言者吾與之先使士會士會辭曰晉人虎狼也若背其言臣死妻子為戮無益於君不可悔也秦伯曰若背其言所不歸爾帑者有如河乃行統朝贈之以策曰子無謂秦無人吾謀適不用也既濟魏人譟而還秦

人歸其帑其處者為劉氏

蓋劉累後
今復故姓

宣元年晉人討

不用命者放胥甲父于衛

七年

宋襄公夫人殺昭公立文公

宋成公卒於是公子成為右師公孫友為左師樂豫為

司馬鱗瓘

古亂

為司徒公子蕩為司城華御

禦事

為司寇

昭公將去羣公子樂豫曰不可公族公室之枝葉也若

去之則本根無所庇蔭矣葛藟猶能庇其本根故君子

以為比況國君乎此諺所謂庇焉而縱尋斧焉者也必不可君其圖之親之以德皆股肱也誰敢攜貳若之何去之不聽穆襄之族率國人以攻公殺公孫固公孫鄭于公宮六卿和公室樂豫舍司馬以讓公子印

昭公弟

八年宋襄夫人襄王之姊也昭公不禮焉夫人因戴氏之族以殺襄公之孫孔叔公孫鍾離及公子印皆昭公之黨也司馬握節以死故書以官司城蕩意諸郊節於府人而出公以其官逆之皆復之亦書以官皆貴之也

十六年宋公子鮑禮於國人宋饑竭其粟而貸之年
自七十以上無不饋詒也時加羞珍異無日不數朔於
六卿之門國之材人無不事也親自桓以下無不恤也
公子鮑美而豔襄夫人欲通之而不可乃助之施昭公
無道國人奉公子鮑以因夫人於是華元為右師公孫
友為左師華耦為司馬鱗矐為司徒蕩意諸為司城公
子朝為司寇初司城蕩卒公孫壽辭司城請使意諸為
之既而告人曰君無道吾官近懼及焉棄官則族無所

庇子身之貳也姑紓死焉雖亡子猶不亡族夫人將使公田孟諸而殺之公知之盡以其實行蕩意諸曰盍適諸侯公曰不能其大夫至于君祖母以及國人諸侯誰納我且既為人君而又為人臣不如死盡以其實賜左右而使行夫人使謂司城去公對曰臣之而逃其難若後君何冬宋昭公將田孟諸未至夫人王姬使帥甸攻而殺之蕩意諸死之文公即位使母弟湏為司城

狄侵魯西鄙

狄侵我西鄙公使告于晉趙宣子使因賈季問酆舒且讓之酆舒問於賈季曰趙衰趙盾孰賢對曰趙衰冬日之日也趙盾夏日之日也

八年

賊殺先克晉殺先都

夷之蒐晉人將登箕鄭父先都而使士穀梁益耳將中軍先克曰狐趙之勲不可廢也從之先克奪蒯得田于董陰故箕鄭父先都士穀梁益耳蒯得作亂九年春

使賊殺先克晉人殺先都梁益耳三月晉人殺箕鄭父士穀崩得

九年

晉弑靈公

范山言於楚子曰晉君少不在諸侯北方可圖也楚子師于狼淵以伐鄭鄭及楚平秋楚公子朱伐陳陳人敗之陳懼及楚平十年秋陳侯鄭伯會楚子于息冬遂及蔡侯次于厥貉將以伐宋宋華御事曰楚欲弱我也

先為之弱乎何必使誘我我實不能民何罪乃逆楚子
勞且聽命遂道以田孟諸宋公為右孟鄭伯為左孟期
思公復遂為右司馬子朱及文之無畏為左司馬命夙
駕載燧宋公違命無畏扶其僕以徇或謂子舟曰國
君不可戮也子舟曰當官而行何彊之有詩曰剛亦不
吐柔亦不如毋縱詭隨以謹罔極是亦非辟彊也敢愛
死以亂官乎 十四年同盟于新城從於楚者服 十
五年新城之盟蔡人不與晉卻缺以上軍下軍伐蔡曰

君弱不可以怠戊申入蔡以城下之盟而還秋齊人侵我西鄙故季文子告于晉冬晉侯宋公衛侯蔡侯陳侯鄭伯許男曹伯盟于扈謀伐齊也齊人賂晉侯故不克而還齊侯侵我西鄙謂諸侯不能也遂伐曹入其郛討其來朝也季文子曰齊侯其不免乎已則無禮而討於有禮者曰女何故行禮禮以順天天之道也已則反天而又以討人難以免矣詩曰胡不相畏不畏于天君子之不虐幼賤畏于天也在周頌曰畏天之威于時保之

不畏于天將何能保以亂取國奉禮以守猶懼不終多
行無禮弗能在矣 十六年春及齊平 十七年晉侯

蒐于黃父遂復合諸侯于扈於是晉侯不見鄭伯以為
貳于楚也鄭子家使執訊通問之官而與之書以告趙宣子

曰寡君即位三年召蔡侯而與之事君九月蔡侯入于
敝邑以行敝邑以侯宣多之難寡君是以不得與蔡侯
偕十一月克減侯宣多而隨蔡侯以朝于執事十二年
六月歸生佐寡君之嫡夷以請陳侯于楚而朝諸君十

四年七月寡君又朝以歲陳事十五年五月陳侯自敝

邑往朝于君往年正月燭之武往朝夷也

將夷朝晉

八月寡

君又往朝以陳蔡之密邇於楚而不敢貳焉則敝邑之故也雖敝邑之事君何以不免在位之中一朝于襄而再見于君夷與孤之二三臣相及於絳雖我小國則蔑以過之矣今大國曰爾未逞吾志敝邑有亡無以加焉

古人有言曰畏首畏尾身其餘幾又曰鹿死不擇音

音所

麻蔭處古字相假用

小國之事大國也德則其人也不德則其鹿

也鋌

他頂反疾走貌

而走險急何能擇命之罔極亦知亡矣將

悉敝賦以待於儵

直角

唯執事命之文公二年六月壬申

朝于齊四年二月壬戌為齊侵蔡亦獲成於楚居大國

之間而從於彊令宣其罪也大國若弗圖無所逃命晉

鞏朔行成于鄭趙穿公壻池為質焉宣元年宋人之

弑昭公也

文十六年

晉荀林父以諸侯之師伐宋宋及晉平

又會諸侯于扈將為魯討齊皆取賂而還鄭穆公曰晉

不足與也遂受盟于楚陳共公之卒楚人不禮焉

卒在文十

三陳靈公受盟于晉秋楚子侵陳遂侵宋晉趙盾帥師

救陳宋會于棐林以伐鄭也於是晉侯侈趙宣子為政

驟諫而不入故不競於楚二年鄭公子歸生受命於

楚伐宋宋華元樂呂御之二月壬子戰于大棘宋師敗

績囚華元獲樂呂及甲車四百六十乘俘二百五十人

馘百人狂狡輅

五嫁

鄭人鄭人入于井倒戟而出之獲狂

狡君子曰失禮違命宜其為禽也戎昭果毅以聽之之

謂禮殺敵為果致果為毅易之戮也將戰華元殺羊食

士其御羊斟不與及戰曰疇昔之羊子為政今日之事
我為政與入鄭師故敗君子謂羊斟非人也以其私憾
敗國殄民於是刑孰大焉詩所謂人之無良者其羊斟
之謂乎殘民以逞宋人以兵車百乘文馬百駟以贖華
元于鄭半入華元逃歸立于門外告而入見叔牂曰子
之馬然也對曰非馬也其人也既合而來奔宋城華元
為植直吏切巡功城者謳曰睥其目睥戶板切儲其腹
弃甲而復于思于思如字弃甲復扶來力使其驂乘謂之

曰牛則有皮犀兕尚多弃甲則那役人曰從其有皮丹
漆若何華元曰去之夫其口衆我寡晉趙盾以諸侯侵
鄭以報大棘之役晉靈公不君厚斂以彫牆從臺上彈
徒人而觀其辟丸也宰夫胹音而羹也熊蹯不熟殺之趙盾

士季患之將諫士季曰諫而不入則莫之繼也會請先
不入則子繼之三進及溜而後視之三進三伏公不省則又前也曰

吾知所過矣將改之稽首而對曰人誰無過過而能改
善莫大焉詩曰靡有有初鮮克有終夫如是則能補過

者鮮矣君能有終則社稷之固也宜惟羣臣賴之又曰
衮職有闕惟仲山甫補之能補過也君能補過衮不廢
矣猶不改宣子驟諫公患之使鉏麇迷賊之晨往寢門
闢矣盛服將朝尚蚤坐而假寐麇退歎而言曰不忘恭
敬民之主也賊民之主不忠弃君之命不信有一于此
不如死也觸槐音懷又音回而死秋晉侯飲趙盾酒伏甲將
攻之其右提彌明知之趨登曰臣侍君宴過三爵非禮
也遂扶以下公噬音噉使音使犬夫葵焉明搏而殺之盾曰弃人

用犬雖猛何為鬪且出提彌明死之初宣子田於首山

舍于翳桑見靈輒餓問其病曰不食三日矣食之

音舍

其半問之曰宦三年矣

宦學也

未知母之存否今近焉請

以遺之使盡之而為之簞食與肉寘諸橐以與之既而

與為公介

為甲士

倒戟以禦公徒而免之問何故對曰翳

桑之餓人也問其名居不告而退遂自亡也趙盾攻靈

公於桃園宣子未出山而復大史書曰趙盾弑其君以

示於朝宣子曰不然對曰子為正卿亡不越竟反不討

賊非子而誰宣子曰嗚呼我之懷矣自貽伊戚其我之
謂矣孔子曰董狐古之良史也書法不隱趙宣子古之
良大夫也為法受惡惜也越竟乃免宣子使趙穿逆公
子黑臀于周立之

楚滅若敖氏

冬楚子使越椒來聘執幣傲叔仲惠伯曰是必滅若敖
氏之宗傲其先君神弗福也宣二年夏晉趙盾及諸
侯之師侵鄭楚鬬椒救鄭曰能欲諸侯而惡其難乎遂

次于鄭以待晉師趙盾曰彼宗競於楚殆將斃矣姑益其疾乃去之 四年初楚司馬子良生子越椒子文曰必殺之是子也熊虎之狀而豺狼之聲弗殺必滅若敖氏矣諺曰狼子野心是乃狼也其可畜乎子良不可子文以為大憾及將死聚其族曰椒也知政乃速行矣無及於難且泣曰鬼猶求食若敖氏之鬼不其餒而及令尹子文卒鬬般為令尹子越為司馬為賈為工正諧子揚而殺之子越為令尹已為司馬

賈為椒諧子揚而已得椒處

子越

又惡之乃以若敖氏之族圖伯嬴於轅遼陽而殺之遂

處烝野將攻王王以三王之子為質焉弗受師于漳澨

水濱秋楚子與若敖氏戰于臯汭伯勞扶食王汰捷

輶及鼓跗扶方著於丁寧又射汰輶以貫笠轂兵車無蓋尊者則邊

人執笠依轂而立以禦寒暑名曰笠轂師懼退王使巡師曰吾先君克息

獲三矢焉伯勞竊其二盡於是矣鼓而進之遂滅若敖

氏初若敖娶于邾生鬬伯比若敖卒從其母畜於邾淫

于邾子之女生子文焉邾夫人使弃諸夢中虎乳之邾

子田見之懼而歸夫人以告遂使收之楚人謂乳穀女
謂虎於菟故命之曰鬬穀於菟以其女妻伯比實為令
尹子文其孫箴尹克黃使於齊還及宋聞亂其人曰不
可以入矣箴尹曰棄君之命獨誰受之君天也天可逃乎
遂歸復命而自拘於司敗王思子文之治楚國也曰子
文無後何以勸善使復其所改命曰生

十年

楚范巫裔似謂三君皆將彊死

初楚范巫裔

必尹

似謂成王與子玉子西曰三君皆將彊

死

丈其

城濮之役王思之故使止子玉曰毋死不及止子

西子西縊而縣絕王使適至遂止之使為商公公泚漢沂

江將入郢王在渚宮下見之懼而辭曰臣免於死又有

讒言謂臣將逃臣歸死於司敗也使為工尹又與子家

謀弑穆王穆王聞之殺闕宜申及仲歸

子家

十一年

鄭瞞遂亡

鄭

所求瞞莫干切北方長狄國在夏為防風氏商為汪芒氏

侵齊遂伐我公卜使

叔孫得臣追之吉冬敗狄獲長狄僑如富父終甥椿其
喉以戈殺之埋其首於子駒之門以命宣伯初宋武公
之世鄭瞞伐宋司徒皇父帥師禦之彫班御以敗狄于
長丘獲長狄緣斯皇父之三子死焉宋公於是以門賞
彫班使食其征謂之彫門晉之滅潞也獲僑如之弟焚
如齊襄公之二年齊王子成父獲其弟榮如焚如弟埋其
首於周首之北門衛人獲其季弟簡如鄭瞞由是遂亡

十三年

邾文公遷于繹

邾文公卜遷于繹史曰利於民而不利於君邾子曰苟利於民孤之利也天生民而樹之君以利之也民既利矣孤必與焉左右曰命可長也君何弗為邾子曰命在養民死之短長時也民苟利矣遷也吉莫如之遂遷于繹五月邾文公卒君子曰知命

衛鄭因魯公請平于晉

公如晉朝且尋盟衛侯會公于沓請平于晉公還鄭伯
會公于槩亦請平于晉公皆成之子家賦鴻鴈季文子
曰寡君未免於此文子賦四月子家賦載馳之四章文
子賦采薇之四章鄭伯拜公荅拜

十四年

齊懿公弑立

齊昭公叔姬生舍叔姬無寵舍無威公子商人驟施於
國而多聚士盡其家貸於公有司以繼之夏五月昭公

卒舍即位秋七月齊商人弑舍而讓元元曰爾求之久矣我能事爾爾不可使多蓄憾將免我乎爾為之公子元不順懿公之為政也終不曰公曰夫已氏襄仲使告于王請以王寵求昭姬于齊曰殺其子焉用其母請受而罪之冬單伯如齊請子叔姬齊人執之又執子叔姬十五年齊人來歸子叔姬王故也

邾立定公

邾文公元妃齊姜生定公二妃晉姬生捷菑文公卒邾

卷一
人立定公捷菑奔晉晉趙盾以諸侯之師八百乘納捷
菑于邾邾人辭曰齊出獲且長宣子曰辭順而弗從不
祥乃還

十五年

宋華耦來盟辭宴

宋華耦來盟公與之宴辭曰君之先臣督得罪於宋殤
公名在諸侯之策臣承其祀其敢辱君請承命於亞旅

上大魯人以為敏
揚祖之罪不敏也魯人以為敏明君子所不與

魯文公薨齊懿公弑

齊侯侵我西鄙 十六年春及齊平公有疾使季文子
會齊侯于陽穀請盟齊侯不肯公使襄仲納賂于齊侯
故盟于郟丘 十七年齊侯伐我北鄙襄仲請盟六月
盟于穀冬襄仲如齊拜穀之盟復曰臣聞齊人將食魯
之麥以臣觀之將不能齊君之語偷臧文仲有言曰民
主偷必死 十八年春齊侯戒師期而有疾醫曰不及
秋將死公聞之卜曰尚無及期惠伯令龜卜楚丘占之

曰齊侯不及期非疾也君亦不聞令龜有咎二月公薨
齊懿公之為公子也與邴馮畜之父爭田弗勝及即位
乃掘其而刖之而使馮僕納閭職之妻而使職驂乘夏
公游于申池二人浴于池馮以扑扶叱音擊也職職怒馮曰
人奪女妻而不怒一扶女庸何傷職曰與刖其父而弗
能病者何如乃謀弑懿公納諸竹中歸舍爵而行齊人
立公子元

十六年

楚滅庸

楚大饑戎伐其西南至于阜山又伐其東南至于陽丘
以侵訾枝庸人帥羣蠻以叛楚麇人率百濮聚於選將
伐楚於是申息之北門不啓楚人謀徙於阪高爲賈曰
不可我能往寇亦能往不如伐庸夫麇與百濮謂我飢
不能師故伐我也若我出師必懼而歸百濮離居將各
走其邑誰暇謀人乃出師旬有五日百濮乃罷自廬以
往振廩同食次于句

古侯

淫使廬戢黎侵庸及庸方城庸

人逐之囚子揚憲三宿而逸曰庸師衆羣蠻聚焉不如
復大師且起王卒合而後進師叔曰不可姑又與之遇
以驕之彼驕我怒而後可克先君蚡冒所以服陞隰也
武王又與之遇七遇皆北唯裨儵蚡冒魚人庸三邑實逐之
庸人曰楚不足與戰矣遂不設備楚子乘駟又實會師于
臨品分為二隊子越自石溪子貝補蓋自仞以伐庸秦人
巴人從楚師羣蠻從楚子盟遂滅庸

十八年

襄仲立宣公

二月公薨初敬嬴生宣公敬嬴嬖而私事襄仲襄仲欲立之叔仲不可仲見于齊侯而請之齊侯許之冬仲殺惡及視而立宣公仲以君命召惠伯其宰公冉務人止之曰入必死叔仲曰死君命可也乃入殺而埋之馬矢之中惠伯死經不書人畏襄仲不敢書也公冉務人奉其帑以奔蔡既而復叔仲氏宣元年會于平州以定公位齊人取濟西之田為立公故以賂齊也十年齊侯以我服故歸濟

西之田

宣公納莒僕季文子出諸竟

莒紀公生大子僕又生季佗

佗何

愛季佗而黜僕且多行

無禮於國僕因國人以弑紀公以其寶玉來奔納諸宣

公公命與之邑曰今日必授季文子使司寇出諸竟曰

今日必達公問其故季文子使大史克對曰先大夫臧

文仲教行父事君之禮行父奉以周旋弗敢失隊曰見

有禮於其君者事之如孝子之養父母也見無禮於其

君者誅之如鷹鷂之逐鳥雀也先君周公制周禮曰則

以觀德

合法德

德以處事事以度功功以食民作誓命曰

毀則為賊掩賊為藏竊賄為盜盜器為姦主藏之名賴

姦之用為大凶德有常無赦在九刑不忘

誓命以下皆九刑書今亡

矣行父還

旋

觀莒僕莫可則也孝敬忠信為吉德盜賊

藏姦為凶德夫莒僕則其孝敬則弑君父矣則其忠信

則竊寶玉矣其人則盜賊也其器則姦兆也

非域也

保而

利之則主藏也以訓則昏民無則焉不度於善而皆在

於凶德是以去之昔高陽氏有才子八人

皆顓頊苗裔

蒼舒

殯

徒回

斂

才五

檣

直由

戲

以善

大臨

危降

江下

庭堅

仲容

叔達

此即

垂益

禹皋陶之倫

齊聖廣淵明允篤誠天下之民謂之八愷

和高

辛氏有才子八人伯奮仲堪叔獻季仲伯虎仲熊叔豹

季貍

即稷

契朱虎

熊羆之倫

忠肅

共懿

宣慈

惠和

天下之民謂之

八元

元善也

此十六族也世濟其美不隕其名以至于堯

堯不能舉舜臣堯舉八愷使主后土以揆百事莫不時

序地平天成舉八元使布五教于四方父義母慈兄友

弟共子孝內平外成昔帝鴻氏有不才子掩義隱賊好

行凶德醜類惡物頑嚚不友是與比周天下之民謂之

渾敦

戶徒本

少皞氏有不才子毀信廢忠宗飾惡言靖譖

庸回

靖安庸用

服讒蒐慝

服行蒐隱

以誣盛德天下之民謂之窮

奇

驩兜渾敦而不開通共工其行窮其好奇

顓頊氏有不才子不可教訓不

知話言告之則頑舍

救

之則嚚傲狠明德以亂天常天

下之民謂之檮杌

鯀頑凶檮杌無疇匹之貌

此三族也世濟其凶增

其惡名以至于堯堯不能去縉雲氏

黃帝時官名

有不才子

貪于飲食冒于貨賄侵欲崇侈不可盈厭

於豔

聚斂積實

不知紀極不分孤寡不恤窮匱天下之民以比三凶謂

之饗饗

貪才曰饗
貪食曰饗

舜臣堯賓于四門流四凶族渾敦窮

奇禱机饗饗投諸四裔以禦魑魅是以堯崩而天下如


一同心戴舜以為天子以其舉十六相去四凶也故虞

書數舜之功曰慎徽五典五典克從無違教也曰納于

百揆百揆時敘無廢事也曰賓于四門四門穆穆無凶

人也舜有大功二十而為天子今行父雖未獲一吉人

去一凶矣於舜之功二十之一也庶幾免於戾乎



春秋左傳事類始末卷一